

## Hof ta condena Michael Gibson na 15 aña di prison pa a tira mata Chines na Yaburibari



## MINISTER ENDY CROES A BISHITA COLEGIO FELIPE B. TROMP En conexcion cu Dia di Himno & Bandera 2022



## Entrada hudicial na Seroe Alejandro y Rooi Kochi pa droga

Project Team Drugspanden ta un team cu a wordo lanta pa entre otro pa investiga bendemento di droga for di un percela y ariba caya.

En conexcion cu un investigacion andando Project Team Drugspanden a haci entrada hudicial na un cas na Seroe Alejandro y un cas na Rooi Kochi.

Aki a detene 3 hende mohenan di inicialnan:

S.C.S.St.J.A. naci na Aruba 29 aña.

S.T.C.Vd L, naci na Aruba 31 aña.

S.H.S. naci na Aruba 64 aña.

Durante razzia na ambos cas a confisca un cantidad basta considerabel di Cocaina, Marihuana y placa.

Na e cas na Rooi Kochi a confisca un revolver tambe.

Pa Cuerpo Policial por resolve mas caso cooperacion y informacion di pueblo di Aruba ta hopi importante, pesey nos ta pidi si bo tin cualkier informacion yama nos tiplijn di Polis cu ta: 11141. Nos ta garantisa cu bo ta keda anonimo. pa bendemento di droga.

Awe 16 di maart ta recorda cu 46 aña pasa Eilandsraad di Aruba a aproba introduccion di nos himno y bandera



**24/7 SERVICE**

**For URGENT Dental Emergencies**  
please call  
**+297 585-3255**  
**+297 592-9398**

**Emerita Bermudez - DENTAL SOLUTIONS**



# GANA

## 500 FLORIN

CU

### PA DIA DI

## SOLO DI PUEBLO

### HIMNO Y BANDERA

18 DI MAART

Feliz dia

**NOMBER Y FAAM:** \_\_\_\_\_

**ADRES:** \_\_\_\_\_

**TELEFON:** \_\_\_\_\_

**ABONADO** Si ☐ No ☐


**TA ANUNCIA GANADOR DIA 17 MAART 2022**

**CORTA E COUPON Y ENTREGA NA OFICINA DI SOLO DI PUEBLO,**

**EDIFICIO COLOR SHINISHI MEI MEI DI KFC Y TACO**

**BOBELL NA STA CRUZ.**

COUPON



## A pensa cu e lo a fayece: Hoben turista burachi drumi na banda di caminda



Bubali - Dialuna atardi polis a bay den un caya na Bubali, unda un


turista lo ta ariba suela y no ta musta bon.

Tawata den careda di 6:30 p.m cu polis a ywga na e sitio indica, y berdad a haya un turista hoben "drumi".

Agentenan mesora a constata cu e hoben aki tawata pata pata burachi.

Polisnan a haci'e algun pregunta, y despues a bise pa e sinta warda un rato pero e hoben posiblemente a compronde bay drumi y e la bolbe bay drumi unda cu nan a hay'e.

Agentenan a pidi pa transportwagen y na yegada nan a hibe un adres ey den Bubali mes.



## Homber a bira malo tras di stuur y causa accidente

Rooi Afo - Diamars merdia algo pasa di 1:30 a sosode un accidente entre algun auto ariba e caminda di Rooi Afo.

Polis y ambulance a bay na e sitio, debi cu un cabayero lo a resulta levemente herida.

Na e sitio polisnan a compronde cu e cabayero herida lo a bira malo tras di stuur causando e accidente.

Con e cabayero aki por a pone cu e otro vehiculonan involvi a dal no ta mucho duidelijk, aunke daño material no tawata grandi.

Paramediconan cu a presenta na e sitio despues di e controla e cabayero na e sitio mes a opta pa bay Hospitaal cu e homber.

Polis di trafico na e sitio hunto cu e companianan di seguro a tuma tur dato





# Hof ta condena Michael Gibson na 15 aña di prison pa a tira mata Chines na Yaburibari

we merdia 2'or, Hof di Corte Superior, a confirma e condena di 15 aña di prison pa Michael Gibson. E ta wordo haya culpable di riba 1 Mei 2017 a tira mata e Chines H.Quach den un apartamento na Yaburibari.

ARUBA NATIVE por a compronde cu luna pasa, despues di practicamente 3 aña, a sigui cu tratamento di e caso den apelacion. Na October 2019 Hues di Corte den Promer Instancia ta haya Gibson culpable di a tira mata e Chines H.Quach. Hues a sigui Fiscal su exigencia y a condena Gibson na 15 aña di prison.

Varios biaha abogado

mr. Arendsz Marchena a purba di haya testigo na Canada pa wordo scucha pa autoridad Canades pero esaki no tabata posibel. Autoridad Canades a informa cu no por haya e personanan y tin algun laga sa di no kier duna declaracion.

Gibson a bisa Hof cu e tin famia grandi na Canada y e famianan di e victima y esnan involvi tambe. E ta conciente di e peliger cu su famia ta aden y pesey no a duna declaracion completo.

El a bisa Hof cu e ta prefera di sinta e castigo, cu bay papia den Corte y su famia ta core peliger pa loke e ta declara. El a bisa



cu si e duna declaracion, e lo wordo mira como informante. Gibson a bisa cu e unico cos cu e lo bisa ta cu e no a tira y no tabatin arma. El a admiti di tabata

den e apartamento pero no den e camber caminda e homber H.Quach a wordo tira mata.

Procurador General a exige pa Hof confirma

e castigo y ayera Hof a confirma e castigo. Michael Gibson ta keda condena na 15 aña di prison.

## NA FEBRUARI 2022 ARUBA A YEGA NA UN RECUPERACION DI 84% DEN COMPARACION CU FEBRUARI 2019

### ARUBA A RICIBI 77,961 BISHITANTE "STAYOVER" NA FEBRUARI 2022

#### 2022 DEN COMPARACION CU 2019

Oficina di Turismo, A.T.A., ta informa cu pa luna di februari nos destinacion a ricibi un total di 77,961 bishitante "stay-over". Si compara luna di februari 2022 cu februari 2019 - cu tabata e ultimo aña normal di turismo, por mira cu Aruba a recupera 84% di locual a wordo ricibi na februari 2019.

E tres mercadonan cu mas a destaca den e cantidad di turista cu a bishita na februari 2022 como tambe den grado di recuperacion ta; Estados Unidos cu 63,114 bishitante cu ta representa un grado di recuperacion di 92% den comparacion cu februari 2019, Hulanda cu 4,395 bishitante cu ta representa un grado di recuperacion di 117% den comparacion cu februari 2019 y Colombia cu 1,456 bishitante cu ta representa un grado di recuperacion di 95% den comparacion cu februari 2019.

#### 2022 DEN COMPARACION CU 2021

2022 a cuminsa cu un crecimiento mas fuerte y stabil cu 2021, maske cu den luna di januari por a wak un caida den recuperacion den comparacion cu e ultimo 8 lunanan di 2021. Sinembargo, e recuperacion den luna di februari ta sumamente positivo.

Si compara februari 2022 cu februari 2021 por wak cu crecimiento di 143.6% den cantidad di bishitantenan "stayover", for di 31,982 bishitante pa 77,961 bishitante.

Si compara februari 2022 cu februari 2021 por wak un biaha mas cu e 3 mercadonan cu mas a crece den cantidad di bishitante stayover ta Estados Unidos cu un crecimiento di 35,343 bishitante "stayover" cu ta representa un crecimiento di 127.3%, Hulanda cu un crecimiento di 3,205 bishitante "stayover" cu ta representa un crecimiento di 269.3% y Colombia cu un crecimiento di 780 bishitante "stayover" cu ta representa un crecimiento di 115.4%.


#### MERCADONAN

Norte America ta keda e mercado mas fuerte pa Aruba y na februari 2022 un total di 65,792 bishitante Norte Americano a bishita Aruba. Esaki ta 84.4% di e total di e bishitantenan "stayover". Na februari 2022, Europa a trece 6,269 bishitante pa Aruba, cu ta 8.0% di e total di bishitantenan "stayover". Un total di 4,444 bishitante cu ta representa 5.7% di e bishitantenan "stayover" tabata procedente di Latino America; y 1.9% di e total di bishitantenan stayover pa februari 2022- cu ta 1,456 bishitante, a bishita nos isla for di otro partinan di mundo.

#### E PROME KWARTAAL DI 2022

E prome 2 lunanan di 2022 Aruba a ricibi un total di 137,754 bishitante "stayover", cu ta representa un grado di recuperacion di 73.5% compara cu e mesun lunanan di 2019. Pa luna di maart ta premira cu nos lo

2021 y 2022 den comparacion cu 2019 a base mensual




por ricibi 92,855 bishitante "stayover".

#### TOURISM CREDITS / CENTRAL BANK OF ARUBA

Di acuerdo cu Banco Central e asina yama "Tourism Credits" (anteriormente yama "Tourism Receipts") pa e prome, di dos y di tres kwartaal di aña 2021 a contribui cu AWG 2,120.10 miyon den nos economia, cu ta 48% mas compara cu e mesun temporada na 2020. Esaki naturalmente ta debi na e pandemia global di Covid-19 durante cual Aruba tambe a cera su fronteranan temporalmente entre mita di maart 2020 te cu juli 2020.



# NOS BANDERA NOS SIMBOLO DI IDENTIDAD



Riba dia 21 di januari 1976 na unda tramite a ser haci pa organisa un concurso di pintamento den pueblo pa un diseño di bandera. Muchanan di scol a pinta esakinan. Un total di 693 diseño a ser ricibi. Nan deseo tabata pa mira un strea di cuater punta esaki tabata pa diferente motibo. Preferencia pa strepi, marca di color horizontal y/of vertical a bin dilanti. Colornan cu mas a resalta cora, blauw y geel. 'Flag Research Institute' na Boston, a yuda scoge e diseño. E color di e bandera tabata Larkspur, escogi di e "British Colour Council Dictionary of Colour Standards", No. 196, conoci como U.N. Blue. E color geel tabata "Bunting Yellow", No. 113,

e color cora tabata "Union Jack Red", no. 210 y e color blanco tabata "White", No. 1, tur color saca for di mesun diccionario.

Parlamento di Aruba a aproba e diseño riba 16 di maart 1976 cu a bira e bandera oficial di Aruba. Esaki a keda inaugura riba 18 di maart 1976. Pa prome biaha a hisa e bandera y a toca e cantica 'Aruba Dushi Tera' como nos himno nacional di Aruba durante un celebracion grandi den Wilhelmina Stadion, na Dakota.

E color blauw di e bandera ta representa e lama cu ta rondona nos dushi isla. E posicion di e strea riba e bandera ta simbolisa e posicion di Aruba den



lama Caribe.

E strea color cora cu rand blanco ta representa e pasion intenso di cada ciudadano pa su isla y e sanger cora di e Indjan cu a bringa pa libertad den Rooi Frances. E rand blanco di e strea ta simbolisa e santo blanco di nos beachnan rond di nos isla, e pureza di e curason di e habitantenan, cu ta respeta husticia, orden y libertad. E strea di cuater punta ta simbolisa tambe e direccionnan di compas, indicando e diferente paisnan di unda hende ta bini Aruba y forma un comunidad cu ta biba den harmonia cu otro formando un union multicultural. Loke ta garantisar libertad maximo.

Geel ta e color di abundancia y e liñanan horizontal ta musta e solidez di tal abundancia. E color geel ta simbolisa tambe e fuente di ingreso di antaño, manera e industria di oro, guano Y aloë, alabes e ta simbolisa nos flora y fauna manera kibrahacha, brasil, bonchi di strena, curahao, tuturuto y wanglo.

Algun puntonan pa tene cuenta cune ora di trata cu nos Bandera:

- E bandera por ser hisa solamente durante salida y bahada di solo;
- Ora ta mantene e bandera hisa parti anochi pa mainta esaki mester ta ilumina



tur momento pa medio di iluminacion apropiá;

- E bandera mester ta hisa te na top di e palo di bandera;
- Hisa y bahamento di bandera mester sosode di tal manera cu e no ta toca tera/superficie/obheto di e palo di bandera y ser ricibi cu man y brasanan;

- Na momento di luto e bandera ta wordo hisa te na top prome y despues ta baha esaki na mita di e palo di bandera;

- Ora di baha e bandera di luto, mester his'e for di e mita di e palo di bandera y sigui his'e te na top pa despues bah'e bek;

- No ta ser permiti pa decora of agrega nada otro riba of na e bandera of uze como material di propaganda;

- E bandera mester ta di un material duradero pa nos clima;

- Asina cu un bandera

fraña of susha mester cambia esaki mesora;

- E mester ta limpi y strika tur ora cu ta necesario;

- E bandera no mester ser uza como parti di un bisti of uniform atletico, cu excepcion di e patch di bandera cu por ser uza riba uniform di personal militar, bombero y polis;
- E lo mester ser destrui ora cu e no ta sirbi mas, door di kima esaki den un manera digno;

- Pa warda e bandera e mester ser dobla bunita y ceremonial;

Entrante 1 di januari 2015 e colornan di nos bandera a wordo oficialisa pa medio di ley y e cambionan a keda manifesta den Ley articulo 11 di (LB ham). E colornan corecto di e bandera di Aruba ta Geel: PMS 109C; Cora: PMS 032C; Blanco: PMS Blanco absoluto y Blauw: PMS 279C.

CCDN, 15 maart 2022

Stan Dabian, PR-CCDN



# Minister Glenbert Croes a anuncia e miembronan di Management Team di DIMAS



Durante e rueda di Glenbert Croes a habri prensa semanal, Minister e siman anunciando

e miembronan di e Management Team cu el a institui na DIMAS. Un paso cu tabata necesario despues cu e relacion di trabou entre Director Sra. Kathy Paskel y e mandatario a keda severamente afecta pa falta di confiansa.

Minister Glenbert Croes, desde cu el a bira e Minister encarga cu Integracion bou di cual DIMAS ta resorta, a bin ta haci su maximo esfuerso pa trece un mehoracion den e servicio di DIMAS. E mandatario tabata kier un servicio eficiente y eficaz pa e clientenan di

DIMAS. Mirando cu e Sra. Ruiz-Paskel tabata semper purba frustra e proceso di mehoracion cu e mandatario a introduci, siman pasa Glenbert Croes a dicidi di nombra un management team cu lo encabesa DIMAS cu tur autoridad otorga pa su persona como e Minister encarga.

Miembronan ta:  
Lirriane Frias - voorzitter  
Edgar Arends  
Henry Baarh  
Jennifer Tromp  
Un representante di Departamento di Recurso Humano

Meta principal di e Management Team ta pa cambia DIMAS su servicio di 'Red Tape pa Red Carpet', un servicio optimal, husto, eficaz, eficiente, humano cu e team completo mirando den e mesun direccion.

E mandatario tin pleno confiansa den e Management Team como tambe den e personal di DIMAS. Un era nobo a cuminsa cu un aire fresco di un team cu ta consisti di sanger hoben combina cu experiencia grandi unda cu uniendo forsa nos lo logra e miho pa e departamento aki.

## Departamento di Impuesto a informa;



E fecha final pa haci declaracion di Loonbelasting, BBO/BAVP/BAZV, speelvergunningsrecht y otro impuestonan mensual di luna di februari 2022 ta wordo prolonga cu un dia mas. E fecha final awor ta bira 16 di maart 2022. E prolongacion aki ta conta tambe pa e pago di e impuesto corespondiente.

Motibo di e prolongacion ta cu durante dia Departamento di Impuesto a experencia un interupcion tecnico di e sistema digital y interupcion den suministro di coriente. Esakinan a afecta e servicionan entre otro e servicio pa medio di e portal "BO impuesto" (BOi). Consecuentemente hopi contribuyente no por a haci nan declaracion y pago.

Cu e prolongacion menciona Departamento di Impuesto ta yuda e contribuyentenan pa asina nan por cumpli cu nan deber na tempo.

Meverly Romano - Vocero di Departamento di Impuesto



**HISA BO BANDERA, CANTA BINGO!**  
**GANA DEN GRANDI!**  
**CARIBBEAN BINGO, MAS GRANDI, MAS WEGA Y MAS CHENS.**

BINGO PROGRESIVO YAMADA	
1 Afl. 300	45 Afl. AUTO NOBO
2 Afl. 300	46 Afl. 20.000
3 Afl. 300	47 Afl. 15.000
4 Afl. 350	48 Afl. 10.000
5 Afl. 400	49 Afl. 7500
6 Afl. 400	50 Afl. 5000
7 Afl. 500	51 Afl. 3000
8 Afl. 700	
9 Afl. 3000	

**POWERBALL**  
Cocoloco Ball Afl. 750  
Ocho Cochocho Afl. 250

**Caribbean BINGO**



# MINISTER ENDY CROES A BISHITA COLEGIO FELIPE B. TROMP

## En conexcion cu Dia di Himno & Bandera 2022



En conexcion cu celebracion di nos dia Nacional dia di nos Himno y Bandera 2022 e Mandatario di Enseñansa ta bishitando diferente scolnan rond di Aruba e siman aki. Diamars mainta tempran e alumnonan di Colegio Felipe B. Tromp na Noord tabata warda Minister Endy Croes su presencia y cu hopi entusiasmo. Na su yegada e Mandatario a wordo ricibi pa cahasante di scol sr. Selwyn Rosenstand. Despues di a saluda alumnonan e Mandatario a bishita e klasnan 5 y 6 unda a duna un charla y asina transmiti e historia di nos Himno y Bandera en coxacion cu celebracion di nos dia Nacional. 'Ta honor pa mi por a para

mainta dilanti e klasnan pa comparti e historia di nos simbolonan Nacional esta Himno y Bandera den su totalidad y inculca den e muchanan e sentimento comun di kico ta significa nos Himno & Bandera cu den e trayecto pa pa Status Aparte, Libertad di Aruba a hunga un rol hopi importante pa unifica un pueblo', e Mandatario a expresa. Minster Endy Croes a sigui bisa cu e muchanan a scucha cu hopi atencion y a intercambia informacion. 'Mi spera di e manera aki den e funcion di Minister di Enseñansa y Deporte nos por keda contribui tambe na nos pais traspasando e historia na nos muchanan cu mañan lo sirbi e pais aki.



Sr. Rosenstand a expresa di ta sumamente contento di a ricibi bishita di e Mandatario di Enseñansa y Deporte y cu e la comparti un momento cu e alumnonan y nos ta spera di ricibi e Mandatario mas biaha na

nos scol. Mester agrega cu Felipe B. Tromp ta scol basico cu tur yiunan di Minister Endy Croes a bishita.

Finalisando Minister Endy Croes ta gradici e cahasante di scol sr.

Selwyn Rosenstand, docentenan y especialmente e alumnonan e bunita recepcion y un mainta asina ameno. Alabes ta invita henter Aruba pa celebra 18 di maart den grandi.



Minister Dangui Oduber

# Siman di conscientisacion di salo lo enfoca riba e consumo di salo y su efecto


Den conexion cu siman di conscientisacion di salo Minister di Salud Publico Sr. Dangui Oduber kier a enfoca riba e consumo di salo y ki efecto esaki tin riba bo salud. E siman di conscientisacion di salo ta di 14 te cu 20 di maart y ta bou encargo di Departamento di Salud Publico y IBISA. E meta ta pa pone enfoca riba e importancia di pone un control saludabel den e consumo di salo pa preveni problemanan cu nos salud fisico. E tema di e siman aki ta "Sacudi e habito di Salo". Minister Oduber su maneho pa cu Salud Publico ta basa riba prevencion ("national multi-sectoral action plan for NCD's 2020-2030") cu ta reconoci pa WHO y PAHO. Pa un bida saludabel nos kier enfoca riba preveni e consumo halto di salo den nos dia diario. E consumo halto tur dia por causa diferente problema pa nos salud y ta pone

nos na riesgo di:

- Presion halto
- Ataca di curason
- Enfermedad na nos riñon
- Y otro enfermedad nan cardiovascular

E salud di nos comunidad ta hopi importante, pa es motibo Ministerio di Salud Publico ta zorg pa e comunidad di Aruba haya hermentnan necesario pa desaroya y implementa cambio den nos habito pa cu consumo di salo.

Minister Dangui Oduber ta pidi comunidad pa ta mas consciente di kiko bo ta cumpra y consumi. Paga tino na cuanto salo e producto ta contene door di lesa e lista di contenido di e producto, di e manera aki bo por controla bo consumo di salo diario. Purba cushina cu menos salo posibel y/of uza otro tipo di producto mas saludabel pa cushina cu ta contene poco of nada di salo.



E campaña di conscientisacion a cuminsa e siman aki y esaki ta e comienso di hopi mas campaña cu Departamento di Salud Publico lo bai traha conhunto cu IBISA y otro organisacionnan durante e aña aki. Tur colaboracion ta pa duna e comunidad di Aruba mas informacion y instruccion di con pa trece cambio saludabel den nan habito y tambe pa tin

un mihor calidad di bida pa full famia.

Minister Dangui Oduber su vision ta pa promove un miho cuido medico pero tambe un miho calidad di bida pa e poblacion di Aruba. Prevencion ta e yabi pa baha gastonan di AZV y tin un cuido medico mas sostenibel.

**Pa abona na SOLO DI PUEBLO**

**Yama 585 9500**  
of manda nos un e-mail na [solodipueblo@gmail.com](mailto:solodipueblo@gmail.com)

Entrega tur dia te den bo port'i cas



**PROGRAMA INFORMATIVO**

Diaranson 16 di Maart

**Minister Glenbert Croes**  
Topico: DIMAS

8:30pm

 CANAL 22

 Minister di Labor, Energia & Integracion

*Ami ta cu Bo*





# Competencia Himno y Bandera Landamento Artistico 2022



- Pa celebra dia di Himno y Bandera, e deporte di Landamento Artistico ta tene nan competencia ariba diasabra 19 maart 2022 na e piscina Olimpico Roly Bislik na Savaneta. Durante mainta lo tin e parti tecnico na unda un grupo di principantenan cu recientemente a cuminsa cu e deporte lo muestra locual nan a sinja pa asina purba di pasa pa e siguiente nivel! Despues lo sigi cu e parti tecnico di e categorianan 12año y 13-15año. Despues atardi lo tin e apertura oficial pa 5.30pm cu defile di tur atleta di Barracudas Artistic Swimming y despues cu e rutinanan ariba musica. Henter Aruba ta keda cordialmente invita

pa bin aprecia e bonita deporte aki!

## Ken nos ta?

Barracudas Artistic Swimming Aruba desde 1973 a introduci e comunidad di Aruba na e bunita deporte di landamento sincronisa, den 2017 a cambia e nomber di e deporte pa landamento artistico. E meta principal di e club ta pa brinda atletanan oportunidadnan pa desaroya y prepara nan mes den e deporte pa competencianan internacional. Recientemente a habri e deporte pa mucha homber por participa mirando e desaroyonan den e deporte internacionalmente. Pa mas informacion of pa



conectacunosporbishita:  
Facebook @barracudas.  
aruba of nos website:  
www.barracudasaruba.

com, Barracudas Artistic  
Swimming Aruba ta e  
unico club di Landamento  
Artistico na Aruba y ta

afilia na Aruba Aquatics  
Federation cu na su turno  
ta miembro di F.I.N.A.





# ENTREGAMENTO DI CERTIFICADO DI SMALL BUSINESS ACADEMY NA COLEGIO EPI



Riba diasabra 19 di februari 2022, Colegio EPI y Qredits a entrega e certificadonan na e graduadonan di Small Business Academy. Small Business Academy (SBA) ta un programa hybrid (face to face/ online) di Qredits cu EPI a brinda na e cursistanan pa yuda nan start up nan negoshi. E curso aki ta brinda e cursista e oportunidad pa e mes por traha su Financial, Marketing y Businessplan di e negoshi cu e lo kier start. Den e programa aki tambe tabata tin e participacion di ATA,

cu lo brinda un maximo di 5 compania un sosten den area di marketing y promocion pa medio di e programa 'Aruba Signature Experience'. 'Aruba Signature Experience' ta focus riba crea experiencianan especificamente riba e segmentonan di niche di romance, actividad activo y bienestar. Tur esaki cu atencion pa oportunidadnan di High value/low-impact, pues promocionando turismo sostenibel cu ta brinda un entrada halto.



Riba e anochi special aki 17 graduado di e programa di SBA a ricibi nan certificado den e Collegeaal di Colegio EPI. E graduadonan ta: Miliene Dinnall Peña, Eribert Delamare, Christopher Danker, Angela Maduro, Anthony de Graf, Franklin Croes, Zarianni Larmonie, Nadine Krosendijk, Jean Paul Muñoz Quintero, Jesus "Coco" Maduro, Douglas Rollock, Bryan Barrero, Hans Zaandam, Marcelle Meijs, Elgin Flanegien, Stephany Pietersz.

Directie di Colegio EPI kier a felicita tur cursitanan y deseana hopi exito den futuro. Adhunto algun potret di e anochi aki.



## Nos ta desea e pueblo henter un feliz Dia di Himno y Bandera

### Diahuebs, 17 di maart 2022:

- Servicio di caheronan na tur localidad lo cera 3:30 p.m.
- Nos Oficina y Departamentonan Tecnico lo cera 4:00 p.m.

### Diabierna, 18 di maart 2022:

- Nos Oficina y Departamentonan Tecnico lo ta cera.



Den caso di emergencia por yama nos Storingsdienst na 523-7147



# Awe 16 di maart ta recorda cu 46 aña pasa Eilandsraad di Aruba a aproba introduccion di nos himno y bandera

Mescos cu cualkier pais na mundo gobierno y Eilandsraad di Aruba a tuma e decision cu 18 di maart nos Dia Nacional, esta nos Dia di Himno y Bandera. Sinembargo, promer cu por a yega na e celebracion historico aki, un lucha tenaz a tuma lugar pa finalmente logra concretisa nos simbolonan di union y libertad.

## Aprobacion di Himno y Bandera

Dia 21 di januari 1976 Bestuurscollege di Aruba a instala un comision di 6 ciudadano prominente di nos comunidad y e comision aki tabata consisti di Maybelline Arends-Croes, Rufo Odor, Padu Lampe, Eddy Bennett, Hubert Booi, Rufo Wever y como secretario J. Wever. E tarea di e comision aki tabata pa conseha Bestuurscollege riba e pregunta si mester haci 'Aruba Dushi Tera' himno nacional di Aruba y si esaki ta afirmativo, ki sorto di ritmo – sea marcha of wals – tin cu wordo uza. E comision den forma unanime a vota na favor di interpretacion di e himno den e ritmo di wals. E comision a duna su recomendacionnan na Bestuurscollege dia 25 di februari 1976 y dia 16 di maart, esta un dia manera awe 46 aña pasa Eilandsraad di Aruba - cu 14 voto na favor y 5 voto contra - a aproba 'Aruba Dushi Tera' como himno nacional di Aruba. Riba e mesun dia aki e decreto di e bandera oficial di Aruba tambe a ser acepta cu 13 voto na favor y 6 contra.

Tabata lamentable si cu e aceptacion di nos himno y bandera no a

bay sin su obstaculonan, ya cu den Eilandsraad tanto AVP como PPA a vota contra nos himno y bandera. Alavez cierto funcionarionan a trata na obstaculiza introduccion di nos himno y bandera. Te hasta a yega asina leu cu nos Libertador Betico Croes mester a hipoteca su cas pa por a cumpra e banderanan pa cu su introduccion oficial dia 18 di maart 1976.

## Pakico un himno y bandera?

Pero e pregunta principal ta, pakico Aruba tabatin mester di un himno y bandera? For di inicio di su carrera politico nos Libertador Betico Croes a constata cu durante decadanan largo tabata existi un division y segregacion den e pueblo Arubano y cu esaki a stroba nos den nos desaroyo economico y tambe politico estatal. E segregacion aki tabata un di e motibonan principal cu a impedi Aruba sali for di e constelacion Antiyano.

## Vision di un gran lider

Como un politico visionario Betico Croes su meta tabata primeramente pa trece union den e pueblo aki. Den un pais, unda ta reina un deseo ferviente pa sali for di e constelacion Antiyano pa bira un pais autonomo, bo mester promove e simbolonan di union y libertad, unda cu cantando bo himno bo ta expresa bo amor pa bo pais y hisando bo bandera bo ta inculca nacionalismo bao di bo pueblo.

Awe 16 di maart 2022 ta un dia historico y di




## ARUBA DUSHI TERA

*1. Aruba patria aprecia,  
nos cuna venera,  
chikito y simpel bo por ta  
pero si respeta.*

*O, Aruba Dushi Tera,  
nos baranca tan stima  
nos amor pa bo t'asina  
grandi  
cu n'tin nada pa kibr'e!*

*2. Bo playanan tan admira  
cu palma tur dorna,  
bo escudo y bandera ta  
orguyo di nos tur!*

*3. Grandesa di bo pueblo ta  
su gran cordialidad,  
cu Dios por guia y conserva  
su amor pa libertad!*



reflexion pa un y tur den e comunidad, ya cu introduccion di nos himno y bandera tabata instrumental den e logro di Status Aparte. Sin e himno y bandera nos ciudadanonan lo no tabata tin nada pa gara na dje y consecuentemente

lo no tabata tin nada pa trece e union tan necesario den e pueblo Arubano.

Partido MEP ta gradici nos Libertador Betico Croes pa su vision y determinacion y tambe na su lider honorario

Nelson Oduber cu tabata e diputado encarga cu e realizacion di nos bandera y nos himno nacional "Aruba Dushi Tera". Den e dlanan nos dilanti, ban nos tur hunto duna realse, honor y respet na nos simbolonan di union y libertad.



Parlamentario Shailiny Tromp-Lee (MEP):

# Gabinete Wever-Croes no ta solamente bin cu proyectonan pa reduci criminalidad pero ta aloca e fondo necesario tambe

Ayera 14 di maart 2022 a tuma lugar den sala di Parlamento un reunion publico caminda a trata e aspecto di criminalidad y problemanan social bou di nos hobennan cu Minister Tjon.

Mi ta contento di por a scucha e fraccion mas grandi di oposicion awe porfin acepta e realidad cu ta nan a ocasiona e crisis social. Cu tur e consecucionan cu nan a subraya y menciona, un tras di otro, durante prome tanda di reunion. Consecucionan manera criminalidad, drop outs, y desempleo. Algo cu di aña 2017 Gabinete Wever-Croes a bin ta menciona y debidamente a y ta dunando e atencion. Mester bisa cu no solamente mencionando plan bo ta cla, pasobra eseynan tabatin y tin hopi, pero door di atende e problematica cu prioridad y apuntando e fondonan necesario pa realisa diferente proyecto/programa y maneho asina berdaderamente bo ta crea solucion.

Hopi a wordo bisa pero tambe hopi a keda haci door di Gabinete Wever-Croes, contrario na loke oposicion kier a insinua ora cu e reunion aki a inicia. Sigur pa loke ta trata Sociaal Crisis Plan nos di Parlamento structuralmente a keda informa mediante raportahe y presentacionnan.

Scuchando tur e preguntanan haci pa oposicion mi no por bisa nada otro cu e ta refleha

un biaha mas cu nan gusta scucha djei lubida, na mes momento e ta subraya e realidad cu nan ta haya raportahe y no ta lesa, e ta accentua tambe claramente cu nan no a y ta atende reunionnan di diferente comision fiho y sigur ta hopi obvio cu nan no a participa na e 13 hoorzittingnan relaciona cu abuso di mucha cu a tuma lugar di oktober 2020 te cu mei 2021 den sala di parlamento. Hoorzittingen cu entre otro SPD, Slachtofferhulp, Fundacion Guiami, Jeugd en zeden politie, Openbare Ministerie, Veiligheidshuis, Orde van Advocaten, SOZA, Reclassering y asina mi por sigui menciona.

Durante prome tanda a scucha pregunta over entre otro Sociaal Crisis Plan, introduccion di straf minimo, abuso di mucha y problematicanan den e keten social. Tur ta problema y of topiconan cu nos a bin ta atende debidamente y tin contestacion caba riba mayoria di e preguntanan haci awe. Oposicion mas bien kier a uza e oportunidad di e reunionnan aki pa ta e



mensahero di mal noticia lubidando cu e crisis social aki ta algo cu a keda hereda di Gabinete Mike Eman I y II. Net AVP kier awe cuestiona y enfatisa gravedad di e crisis social ocasiona door di nan propio negligencia y falta di atencion debido y di no dune prioridad.

Como pais, como pueblo nos mester realisa cu ta bay rekeri mas tempo, mas placa y mas hende pa por atende cu e crisis social. Cual tur ta elementonan hopi schaars. Nos no mester lubida nos situacion, nos no por lubida e mega

debe cu AVP a ocasiona y e situacion financiero desastroso cu nan a laga atras cu sigur a keda empeora door di e pandemia cu a bati na nos porta apenas den e di 3 aña di Gabinete Wever-Croes. Na mes momento nos mester realisa cu resultado di maneho y inversion den asuntonan social ta tuma tempo pa cristalisa.

Pa conclui mi kier felicita Minister Tjon pa a contesta tur pregunta a base di cifras y hechos. Ademas el a elabora riba tur e proyectonan na caminda pa local

ta trata prevencion di criminalidad bou di nos hobennan y mas importante, esaki ta bisto den presupuesto 2022. Pues no ta solamente proyectonan y ideanan bunita, pero tambe fondo necesario pa por cuminsa ehecuta esakinan. Cu e contestanan y informacion amplio brinda den e reunion publico aki mi ta convenci cu e problemanan social lo sigui haya e atencion necesario y oposicion den su totalidad lo sa di aproba e presupuesto cu lo mester percura pa haci tur esakinan posibel.



**TOP MORNING SHOW**

**Julisa ARENDS HOEVERTSZ**

**Top 95 FM**

**MONDAY TO FRIDAY 9AM - 12PM**

**WWW.TOP95FM.AW**  
WWW.FACEBOOK.COM/TOP95FM



# Hendrik Tevreden: Tur loke ta bon pa Aruba oposicion ta vota contra

Mi ta sumamente decepciona cu resultado di e votacion di siman pasa pa duna e instituto di Ombudsman un posicion cu lo wordo ocupa pa un persona independiente. Un persona cu ta wordo presenta pa Hof van Justitie, Raad van Advies, Algemene Rekenkamer manera ta wordo splica den articulo no. 5 di e ley. Oposicion un biaha mas a demostra nan cara real cu ta pa sembra duda y division solamente den tur paso cu ta wordo hasi pa bai dilanti como pais. Tur loke cu ta na favor di Aruba of bienestar di e pais aki, nan ta vota contra. Simplemente pa haci politica.

Lamentablemente oposicion ta uza e excuus di amienda no. 6 cu no a wordo acepta como excuus. Pero e realidad ta cu e postura tuma aki ta muestra cu ta nan ta contra Ombudsman. Un ley cu a drent parlamento na 2005, cu a cana un

caminda imparcial. Kico ta mas importante? Nan ego politico of e hecho cu Ombudsman ta wordo ancla den Constitucion. Pa mi e contesta ta, cu tin scohe pa loke ta prioridad, y esey ta pa termina e trayectoria aki di 2005.

E ley ta percura pa tin un proceso hopi transparente den nombramento di e Ombudsman, tur partido tawata participe den e preparacion, tur fraccion a duna opinion, mas di 19 reunion a bai den esaki. Un kwartier maker independiente a guia e proceso. Kiermen e excusa cu Gobierno lo por yega nombra o kita un persona no ta substancia.

E persona cu wordo presenta pa e instancianan menciona ta wordo manda Parlamento y dos tercera parti di Parlamento lo mester vota na favor di e persona. Pues un proceso hopi transparente y limpi cu ta sigura cu no por tin

hungamento di weganan politico.

Aruba tabata e ultimo pais den Reino pa cumpli cu introduccion di un Ombudsman y awor nos ta keda atras atrobe den esaki. Ta hopi aña diferente politiconan a lucha pa trece esaki, pero lamentablemente nos tin di keda partidario den punto nan cu no tin di haber cu partido mes manera esaki.

E posicion meskin tuma door di oposicion ta demostra cu nan no tin interes pa bini na mesa, dialoga, sino mas bien tira un show publico y dividi. Prefera di bay pafu di parlamento haci politica, trata di trece duda ariba un ley cu a pasa den un proceso asina serio y largo pero no ta papia di berdad. E amienda no. 6 no tabatin ningun balor agrega pa e instituto di Ombudsman. Y asta nan por a duna e beneficio di duda pa mira con e lo funciona. Pero e boluntad a hasi falta.



Hustamente awor cu e ley no a wordo ancla den constitucion, e ta vulnerabel pa metemento politico. Pesey mi a urgi oposicion pa nos considera pa vota pa e ley. Nos ta hasie pa nos comunidad pasobra e ta sumamente

necesario. Pero mi a sinti cu oposicion a scohe pa hunga wega politico. Un wega di mucha den un sala di Parlamento cu ta destina pa hende grandi. Esnan di oposicion lo carga esaki riba nan consenshi di a vota contra bienestar di pueblo.

## Kerki Protestant na Playa ta invita Aruba pa actividad pa Dia di Himno y Bandera

Kerki Protestant na Playa ta tene un actividad den cuadro di Dia Nacional di Himno y Bandera dia 18 di maart 2022 di 10 am pa 3 pm den cura di kerki.

Ademas di un mercado di purga cu varios articulo útil, tin cuminda crioyo, cuminda surnam, bolo, cos dushi, popcorn & raspao. Tin un desfile di auto classico y musica di DJ Alvin.

Henter pueblo di Aruba ta keda invita pa bin pasa un rato agradabel dia di nos Himno y Bandera y na mes momento contribui pa un bon causa.

Contact persoon:

Vanessa Bareño

+2975937038

vanessabareno@gmail.com



## Prome Minister Evelyn Wever-Croes

# DISCURSO DI PROME MINISTER NA CEREMONIA DI CONMEMORACION DI DOS AÑA DI COVID-19 NA ARUBA



Diadomingo 13 di maart Aruba ta conmemora dos aña cu Covid-19 a bati na nos porta. Riba 13 di maart, 2020, dos caso di Covid a wordo detecta. Pa e ocasion, Gobierno di Aruba a tene un ceremonia solemne dilanti di Bestuurskantoor pa conmemora esaki y recorda nos ciudadanonan cu a fayece cu Covid aki na Aruba. ‘Den Union pa Recorda y miho Speransa pa Futuro’.

Prome Minister Evelyn Wever-Croes den un discurso hopi emocional a enfatisa cu e fe y confiansa di e ciudadanonan di Aruba, lo hiba nos na recuperacion y pa nos ta firme y resiliente como pais.

Discurso di Prome Minister Evelyn Wever-Croes:

“Mester cera scol, cera frontera, cancela celebracion di 18 maart, a bin toque de queda, y a tene tur hende paden. Mi ta corda tur e sentimentonan cu tabata domina e tempo ey den pueblo y den ami tambe. Preocupacion. Temor. Tristesa. Pero mes momento determinacion y un forsa increibel pa enfrenta e reto aki y sali mas fuerte di dje. Nos a uni como un nacion, y nos a bringa e pandemia hunto. Awe nos tin e situacion hopi bon bou di control, y nos ta den e exit strategy caba, pendiente pa mira tambe kico mundo ta determina.

Awe, diadomingo 13 di maart, 2 aña despues, tin 52 caso activo. Ya ta un luna desde 13 februari, cu nos tin menos di 100 caso activo. Y nos capacidad na hospital ta completo pasobra nos no tin patient cu covid den ICU.

Aruba, un di e paisnan pionero den region asina ta dominando e pandemia, y na forma responsable a flexibilisa mayoria di e medidanan.

Nos tin un grado di vacunacion halto. Di nos poblacion adulto (18+) 82% tin e prome vacuna, y 78% tin e di dos vacuna. Locual si ta preocupa nos ta cu solamente 31% di esnan riba 18 aña, a tuma e booster. Di aki mi ta haci un apelacion un biaha mas pa nos sigui cuida y sigui vacuna.

Sin embargo nos tin un dolor grandi, esey ta e mas di 6 miyon personanan cu a fayece rond mundo cu Covid, y den nan nos 212 rumannan cu a fayece cu Covid aki na Aruba. Awe nos a bin hunto pa recorda nan. Ban uni den oracion pa nan sosega na paz.

Ban tene den oracion tambe nan famianan, y esnan cu a stima nan. Tabata momentonan hopi duro di mester despedí di un ser keri. Y locual a haci e hopi mas difícil den temporada di pandemia ta, cu mester a haci esaki den forma cu nos no ta custuma.

Mi ta spera cu e bunita recuerdonan cu boso tin di boso sernan keri, por duna boso forsa cu e perdida aki.

Awe mi kier para keto tambe y gradici tur esnan cu a traha incansablemente pa nos combati e efectonan di e pandemia. Un pandemia cu a afecta nos país riba diferente área.

### Cuido di salud:

Un danki na tur nos frontliners, cu den temporada di hopi inseguridad a sa di duna e miho cuida posibel. Docternan, enfermeronan, Ambulance, personal di DVG, DBZ, personal di test center y di taskforce. Cu no solamente tabata controla si personanan den isolacion ta na cas, sino den caso cu tabata necesario, tabata hiba cuminda pa nan tambe.

### Siguridad:

Toque de queda, samenscholingsverbod, etc, medidanan cu ta limita bo movicion liber, y cu un impacto hopi grandi. Nos autoridadnan cu a mantene ordo, Polis, CEA, Aduana, tur esnan encarga cu cuida nos costa.

### Economía:

Lamentablemente e efecto aun mas grandi a wordo sinti den nos economía. Hopi a perde trabou y hasta nan negoshi. Programanan di Gobierno manera FASW, subsidio di salario, alivio fiscal y asistencia na empresanan mediano y chikito, a yuda suavisa e dolor, pero e impacto asina mes tawata hopi grandi. Gradici esnan cu a lucha duro pa mantene nan



negoshi habri, empresanan grandi, mediano y chikito, e weso di lomba di nos país, y principalmente pa mantene nos trahadonan na trabou.

### Crisisteam:

Mi ta gradici e profesionalnan den henter e structura di Crisisteam cu a asisti nos den tuma e miho decisionnan posibel, bou condicionnan hopi hopi difícil. Nos tin un ekipo di hendenan dedica, prepara y cu curashi.

Finalizando mi kier pidi henter comunidad, pa awe nos reconfirma nos compromiso cu nos lo sigui lucha pa hiba nos pais padilanti. Nos lo sigui cuida, nos lo sigui vacuna. Mi no por garantisa cu no lo bin otro variante. Pero mi por garantisa si cu nos ta prepara bon, pa si e bin.

P’esey ta asina importante pa abo tambe vacuna.

Ora mi mira atras riba e dos añanan aki, mi ta mira un periodo difícil, hopi difícil. Un periodo cu hopi preocupacion. Pero mi ta mira tambe un periodo caminda cu nos cu ta biba aki na Aruba, a bay bek na nos raisnan, na nos costumernan. Nos a cera mas cu otro. Nos tabata yuda e bisiña of e familiar cu un sopi of un te di moringa. Nos a uni como país.

Y p’esey mi tin tur fe y confiansa cu lo bay nos bon den futuro. Manera nos himno ta bisa, Aruba Dushi Tera Nos baranca tan stima Nos amor pa bo t’asina grandi

Cu’n tin nada pa kibere. Esey ta loke nos a demostra den e dos añanan aki, y pa esey mi kier yama bo danki”!



# Parlamentario Marco Berlis (MEP) ta papia di Gas natural: GAS NATURAL E SOLUCION LOGICO PA E PRIJS HALTO DI PETROLEO

**Tempo lo demostra e vision excelente di Web Aruba N.V. y Gabinete Wever-Croes II**

Specialmente den e ultimo lunanan pueblo por a wak un aumento drastico den e prijs di gasolin. Como Vice-Voorzitter di e Comision Fiho di OverheidsNV's, Nutsbedrijven en Energie mi ta siguiendo e desaroyonan aki hopi di cerca. E aumento drastico di gasolin a sucede pa motibo di e prijs creciente di petroleo riba mercado. Awor cu tin un guerra na Ukraina, e aumento di prijs di petroleo a acelera ainda mas. Ora nos lesa noticia di diferente paisnan grandi manera Merca, na Europa y otronan tur ta kehando di esaki. For di Maart aña pasa e prijs di bari di Petroleo tabata \$65.41 compara cu e prijs

di awe cu ta \$103.88. E aumento drastico den e prijs di petroleo cu semper a demostra di ta hopi instabil, tambe ta afecta nos planta nacional di energia y awa Web Aruba N.V. Nos planta nacional ta opera riba HFO, cu ta significa: Heavy Fuel Oil. Si nos compara e prijs di aña pasa Maart cu e aña aki Maart tin un aumento di 58.81% den e prijs di petroleo.

E ta un di e varios factornan pakico Web Aruba N.V. y Gobierno a tuma e decision clave pa introduci Gas Natural como e fuel di transicion pa Web Aruba N.V. traha cu ne. E Prijs di Gas Natural

ta hopi mas economico y limpi compara cu HFO. Informacionnan recien cu a yega na mi persona ta indica cu e proceso di Eagle LNG ta canando hopi bon y segun e timeline cu nan a establece pa por keda cla pa cuminsa construi e planta y bunkering station.

Mi no tin duda cu Aruba lo uni su mes na paisnan industrial grandi cu ta opera y biba riba un nivel halto y moderno pa hopi aña caba, usando Gas Natural. Aruba mester ta orguyoso cu nos no ta bay depende riba HFO mas y e inseguridad cu esaki ta trece pa via di su prijs instabil. Ademas e suma haltisimo cu Web

Aruba N.V. ta pagando actualmente pa su fuel, esta HFO, lo baha considerabelmente. Esaki ta un beneficio logico pa nos pais. Naturalmente esaki lo traduci den un maneho cu lo tin e flexibilidad pa sigura un bon prijs di awa y coriente pa pueblo. Adicionalmente e lo crea fondonan pa Web Aruba NV por sigui inova y inverti den e planta, pa esaki por sigui garantiza un suministro constante y stabiel na nos pueblo.

Den e crisis aki locual Aruba mester aworaki ta establece e vision pa un Aruba moderno y resiliente cu ta rekeri decisionan concreto y



rapido pa yuda nos pueblo acapara cu e situacion economico actual y cu lo trece alivio den cartera di tur hende. Gas natural lo yuda Web Aruba N.V. y nos pueblo yega na un estabilidad cu nos no a conoce prome.

**Minister Maduro na ocasion di Dia di Hende Muhe 2022:**

## Aruba ta wordo midi na e manera cu nos ta trata hende muhe den posicion di liderazgo na nos Pais

ur aña dia 8 di maart mundo henter ta observa y conmemora Dia Internacional di Hende Muhe. Un dia yena cu palabra di elogio, admiracion y mensahe bunita pa encurasha nos hende muhe, specialmente nos hobennan pa nan desaroya nan mes y no keda atras den un mundo cu hopi biaha ta domina pa e ser masculino. E aña aki mes e tema tabata 'Break the Bias,' un apelacion pa kibra cu tur prehuicio cu por ta existi pa cu e ser femenino.

Na Aruba tambe nos a conmemora e dia aki cu hopi atencion y mester bisa cu nos Pais ta bendiciona cu hopi hende muhe cu ta inspira otro pa e manera cu nan a sa di desaroya nan mes den nos comunidad. Na mes momento e aña aki tambe a bira mas visibel con, 'forsanan' cu no ta kere den e liderazgo femenino di nos Pais, ta manifestando nan mes na e manera di mas baho posibel pa purba kibra e avance di dos hende muhe cu a percura pa desaroya nan mes y a tuma e curashi pa ocupa un funcion den politica y liderazgo di Aruba. Aki ta referi na e atakenan baho contra nos Minister President Evelyn Wever Croes, kende ta habri e caminda pa hopi otro hende muhe como e prome minister-president femenino di Aruba, y na mi persona, Xiomara Maduro, como Minister di Finansa y Cultura di Aruba. Un responsabilidad cu hopi no lo tin e curashi pa tuma na bienestar di nos Pais.

E ta conoci cu e tarima politico ta domina pa e hende homber, pero ta conoci tambe cu mas y mas hende muhe ta haci nan entrada y ta posiciona nan mes exitosamente como lidernan di nan Pais. Na Aruba tambe ta asina y mas hende muhe ta acepta e reto pa traha na bienestar di nos Pais den e ambito politico. Den e luz di e celebracion di Dia di Hende Muhe 2022, nos lo tin cos pa gaba mundo cun'e, pero lamentablemente e atakenan baho diariamente contra dos mandatario femenino di nos Pais ta trece un mancha riba e orguyo cu nos por tin como Pais cu ta balora su hende muhenan den posicion di liderazgo. Mescos cu mundo ta balora un Pais na e manera cu nan ta trata nan mascota, na analogia lo bo por bisa cu Aruba ta wordo midi na e momentonan aki na e manera cu ta trata cu e hende muhe den e posicion di liderazgo.

Nos por tin diferencia di opinion, pero esaki no mester hiba na scenario di lastra mandatarionan femenino cu palabranan ofensivo, caricatura vulgar y videonan cu ta ataca e dignidad di e hende muhe. E ta un lastima y un berguensa cu pa falta di argumento ta recurri na e forma mas baho di oposicion contra dos mandatario femenino di Aruba. Banda cu e ta manda un señal demotivador na tur nos hende muhenan cu ta pensa pa sirbi Aruba den e nivelnan di



mas halto den politica di nos Pais, e ta ofende e sernan stima di e mandatarionan cu no tin e 'cuero diki politico' cu Minister-President y Minister di Finansa di un Pais mester tin. E forma baho aki cu nos Pais ta observa contra dos mandatario femenino di Aruba ta muestra nos cu tin hende ainda na nos Pais cu no ta balora nan señora casa, nan yiu muhernan y nan propio Mama cu a brinda nan bida. Cada bes cu recurri na e forma baho di hiba oposicion aki, ta limita e speranza di Aruba pa conoce mas hende muhe den posicion di liderazgo. No ta Dia di Hende Muhe so mester papia bunita, henter aña mester muestra cu nos actonan cu na Aruba nos ta balora y apoya nos hende muhenan cu tin e curashi y motivacion pa asumi un posicion di liderazgo den nos comunidad, specialmente den politica y gobernacion di nos Pais.



# Prome Minister Evelyn Wever-Croes: En conexion cu Dia di Himno y Bandera, **PROME MINISTER A BISHITA MON PLASIR SCHOOL**

Diamars 15 di maart merdia, muchanan di scol basico Mon Plasir School cu yen di entusiasmo tawata wardando yegada di Prome Minister Evelyn Wever-Croes na nan scol. Den cuadro di Dia di Himno y Bandera, Prome Minister ta bishitando algun scol pa mira con e muchanan ta prepara pa nos dia nacional. Prome Minister a keda hopi impresiona di tur loke Mon Plasir School ta haciendo pa celebra e dia aki y e informacionnan cu nan ta duna na nos muchanan.

Na su yegada na e scol, Prome Minister a wordo ricibi pa e cabesante Juffrouw Debby Arends, demas docente y alumnonan hopi contento ta zwaai bon bini na Prome Minister cu nan banderín di Aruba.

Prome Minister a bishita klasnan 5 y 6 y a expresa cu esakinan tawata encuentran hopi interesante. Prome Minister a conta un tiki di nos Himno y Bandera pero mas bien su deseo tawata pa scucha di e muchanan loke nan sa di nos dia nacional. Interesante y bunita tambe tawata e exposicion di articulonan di antes cu nos hendenan tawata uza. Den esaki Prome Minister ta felicita tanto e docentenan, muchanan pero tambe e mayornan cu sigur a yuda den esaki.

“E muchanan a haci hopi pregunta interesante. Bo ta wak cu nan ta hopi interesa den tur loke ta sosode y esey ta loke nos kier, muchanan bon informa, bon prepara pasobra ta nan tin cu tuma over mayan. Mi a keda hopi



impresiona y contento di e bishita akinan tambe. Nan ta preparando pa Dia di Himno y Bandera pero principalmente nan ta prepara nos ciudadanonan di futuro, ciudadanonan cu kier participa y kier duna nan opinion y esey ta algo cu mi ta aprecia hopi”,

Prome Minister a enfatisa.

Prome Minister ta gradici Juffrouw Debbie y tur esnan cu a haci e encuentro aki posibel y ta desea tur docente, alumno y mayornan di Mon Plasir School un dushi Dia di Himno y Bandera.

## Filomena College MAVO ta gradici Aruba



E siman cu a pasa, Filomena College MAVO na San Nicolas, a ricibi un cantidad grandi di alumno- y mayornan durante di su Opendag 2022.

Riba e opendag, varios tawata e lesnan cu tawata duna. Alumno-, mayor- y maestronan di scolnan Basico di Aruba a honra Filomena College

cu nan bishita. Algun les cu tawata brinda ta Geschiedenis, CKV, N & T, Wiskunde, Engels y Papiamentu entre otro. Na final di e opendag, e entusiasmo di tur e bishitantenan cu a acudi, tawata grandi.

Directorado y tur maestro ta manda palabra di danki y ta conta cu inscripcion di e alumnonan pa aña





# Ronella Croes, C.E.O. di A.T.A. durante e ceremonia di conmemoracion di dos aña di COVID-19 na Aruba:

**“Mientras nos ta sigui adapta na e realidad nobo cu nos ta aden, si nos sigui traha hunto y nos sigui haci uzo di nos resiliencia Arubiano, nos lo yega hopi leu. Laga nos mantene e enseñansanan aki cu Covid-19 a laga pa nos.”**



Durante e ceremonia di conmemoracion di dos aña di Covid-19 na Aruba, C.E.O. di A.T.A., Ronella Croes a comparti algun palabra. A inicia cu enfoca riba e impacto cu Covid-19 tawata tin riba e industria di biahe y turismo mundialmente, y especialmente kico esaki a nifica pa Aruba mirando nos dependencia di turismo.

A toca e tema di ceramento y reapertura di nos fronteranan na 2020, e strategia di reapertura, particularmente pa e mercado di Estados

Unidos, mirando cu Aruba tawata un di e promenan pa habri bek pa e mercado ey y a splica cu esaki tawata un riesgo calcula cu a wordo tuma, demostrando liderazgo y curashi di parti di Aruba.

Tambe a menciona cu recuperacion ta riba bon caminda y na aña 2021, Aruba a recupera 72% di bishitante den comparacion cu 2019, superando e escenario optimista defini pa 2021. Na esaki Sra. Croes a agrega cu Aruba tin un di e gradonan di recuperacion mas halto den region y segun

proyeccion pa 2022, Aruba lo por yega cerca di e nivel di 2019.

Adicionalmente di e tema di turismo, a papia tambe di e impacto cu Covid-19 tawata tin riba nos bida diario y con den nos comunidad tin persona cu a perde trabao, a sinti e efectonan riba nan salud mental y tambe personanan cu a perde miembranan di famia y amistadnan.

A uza e espacio aki pa recorda nos comunidad cu resiliencia ta parti di ken nos ta y esaki sigur a keda demostra durante



e pandemia. Tawata tin hopi momento dificil, pero nos a siña tambe pa aprecia nos hendenan, lugarnan y momentonan paso nos a wak con facil ta pa perde nan. Nos a haya e oportunidad di observa nos naturaleza den su gloria natural. Nos por a sumergi nos mes den e beyesa di nos isla. Nos por a comparti experiencianan nobo cu sernan keru.

“Mientras nos ta sigui adapta na e realidad

nobo cu nos ta aden, si nos sigui traha hunto y nos sigui haci uzo di nos resiliencia Arubiano, nos lo yega hopi leu.

Laga nos mantene e enseñansanan aki cu Covid-19 a laga pa nos. Nos ta resiliente, nos tin e forza ey, cada persona tin’e ... no lubida, aunke kisas algun ta sinti cu e ta dificil pa detecta. Nunca entrega y semper keda bai dilanti, paso a paso.”







**TENE NA  
CUENTA  
E USO DI  
TAPA BOCAS**

# 25 EDICION SUPER EGGHUNT

**500  
WEBO**



**Diadomingo 17 di April 2022 Start 9:00am**

*Dinners, hotelstay, bon di gasolin, carchi telefon, gift certificate,  
telefon celular, tablets, premio cash y hopi mas.*

**AFTER PARTY CU BANDA Y DJ**



# SIMAN DI CONSCIENTISA- CION DI SALO

En coneccion cu siman di conscientisacion di salo awe 14 te cu dia 20 di maart Departamento di Salud Publico y IBISA ta pone enfoka riba e importancia di pone un control saludabel den e consumo di salo pa preveni problemanan cu nos salud fisico. E siman aki nos tin e tema di "Sacudi e habito di Salo".

Pa un bida saludabel nos kier enfoca riba preveni e consumo halto di salo den nos dia diario. E consumo halto tur dia por causa diferente problema pa nos salud y ta pone nos na riesgo di:

- Presion halto,
- Ataca di curason,
- Enfermedad na nos riñon,
- Y otro enfermedad nan cardiovascular.

E salud di nos comunidad ta hopi importante y pa es motibo aki nos seccion promocion di salud ta comparti e hermentnan pa desaroya y implementa cambio den nos habito pa cu salo.

Punto nan cu por aplica ora di consumi salo ta:

- Limita e tipo di snacks den cas cu ta contene salo, por ehempel chips cu ta contene salo.
- Ora di hasi compras, lesa e contenido di salo y tuma nota e suma di sodium

den e produkto. Den e lista di contenido por wak e percentage cu un persona por consumi den un dia, e percentage mesters ta abou.

- Sea alerta ora di come afo di cas, tuma nota pa e opcion nan di plato tin minimo salo. Y si ta contene salo caba, no agrega mas den esaki.

- Ora di cushina, hasi uzo di produkto nan mas fresco posibel. Por ehempel uzo di celery, parsley of basil den nos cuminda.

- Hasi uzo di ingredientenan cu ta contene un minimo di salo of niun salo ora di prepara nos dushi sabor den cuminda. Por ehempel curry, turmeric of garlic.

E siman aki e campaña ta netamente e comienso di hopi mas cu Departamento di Salud Publico lo bai traha conhunto cu IBISA y otro organisacionnan durante e aña aki.

Tur colaboracion ta pa duna e comunidad di Aruba mas informacion y instruccion di con pa trece cambio saludabel den nan habito y tambe pa tin un mihor calidad di bida pa full famia.

Pa mas informacion por sigui e pagina di Facebook di Directie Volksgezondheid DVG Aruba of yama riba 522-4200.



**ALERTA!**

75 % di e salo cu nos ta come ta scondi den e productonan cu nos ta cumpra. Come menos di 5 gram pa dia pa bo mehora bo salud. Cu condimentonan fresco y sin salo, nos por blba un bida cu hopi mas sabor y saludabel.

**Sacudi e habito di salo**

**Siman di conscientisacion di salo**

**14 Pa 20 Di Maart 2022**

**IBISA**  
Instituto Biba Saludabel y Activo

**DVG**  
DIRECTIE VOLKSGEZONDHEID

**PUEBLO A HAÑA SU  
PEN BEK**

Pa kualkier informacion  
[solodipueblo@gmail.com](mailto:solodipueblo@gmail.com)  
of  
**585-9500**

**DFR**

TA PRESENTA  
**WEGANAN POPULAR**  
Lugar: Dam di Kas Ariba

**FELIZ DIA DI  
Flamta y Bandera**

**18 di MAART**  
**1'or-8'or pm**

**PA MUCHA:**

- Yena Boter cu Awa di Dam
- Bulamento den Saco
- Careda di Webo
- Careda di Tire
- Ranca Cabuya

**PA ADULTO:**

- Bebe Cerbes
- Claba Clabo
- Toro cu Toro
- Baca cu Baca

**ATRACCION:**

- Balansamento di Auto
- Subimento di Palo di Seba

**Bar y Cushina Crioyo bon surti**

**Ambiente  
Dimes!!**





HISA BO BANDERA, CANTA BINGO  
**GANA DEN GRANDI!**  
 CARIBBEAN BINGO, MAS GRANDI, MAS WEGA Y MAS CHENS.



**DEN 45 YAMADA GANA UN  
 SUZUKI S PRESSO NOBO**

**DEN 46 YAMADA GANA  
 AWG. 20.000**

**Celebra 18 di maart den grandi, hungando Caribbean Bingo den  
 comodidad di bo cas of bin hunga cu nos na Palm Beach Plaza.  
 Yama den aire na 747-9866 of 564-8188 y canta bo Bingo. *Ban pa Bay!***



E bola ta cuminsa lora pa 7.30pm. Sintonisa canal 22 of bin hunga  
 na Palm Beach Plaza. Bin trempa pa reserva bo luga.

**Servicio di Delivery: 593-9301 / 564-8188**







## Tratamento cu druif pa rehubenece e cuero

Cu paso di tempo, e cuero ta perde firmesa y elasticidad. Ta surgi lachi, mancha y imperfeccionnan cu ta haci'e mahos.

Si nos suma un alimentacion inadecua, poco hidratacion of hopi exposicion na solo, e situacion ta bira pio.

Bo sa con pa elabora tratamento di druif pa rehubenece bo cuero? Pa recupera e frescura y beyesa di cuero, tin alternativanan natural.

For di thee erde te na exfoliantenan casero, ta yuda debilbe e tersura y briyo.

En particular, e tratamentonan natural cu druif pa rehubenece bo cuero, ta ofrece resultadonan excelente.

Tratamentonan natural cu druif pa rehubenece bo cuero

Druif ta un potente antioxidante, cu ta combati e degradacion di e elastina y collagen. E ta yuda den e eliminacion di e celnan morto y frena embehecemento prematuro.

Esaki ta debe na su composicion di polifenol, flavonoice, resveratrol, catekina y tanino. E fruta aki tambe ta rico den acido organico manera acido citrico, tartarico y malico.

Vitaminanan A, B1, B2, B3, C y K y e mineralnan manera zinc y koper, fosforus, magnesium y potasium, ta complementa su beneficcionan.

Tur esaki ta haci cu, den e ambito di estetica, ta un excelente aliado.

### Mask di druif

Bo por probecha tur e beneficcionan di druif, empleando mask y tratamentonan facial. Pa



recupera e beyesa di e cara ta hopi eficaz un potente mask di druif.

E recetanen ta numeroso, eficaz, facil di prepara y economico:

### Pa rehubenece

Den un recipiente, machica 15 druif. Agrega awa te logra un mescla homogeno, pero no excesivamente diki.

Tambe por raspa e mesun cantidad di druif den un recipiente y hink'e den frigidaira durante mey ora.

Despues, nos ta haci e cara bon limpi y ta aplica e receta scogi. Nos ta lag'e actua durante 20 minuut, nos ta haw'e cu abundante awa y hidrata manera di custumber.

### Cu juice di druif

Nos por emplea un juice batido di druif entre e tratamentonan facial pa regeneracion di e cara.

Pa prepara e otro receta aki, nos ta blend dos cuchara di juice di druif, dos di almendra dushi y un di hariña di avena.

E crema obteni nos ta aplica na e cara y net y nos ta lag'e actua 15 minuut. Nos ta hawa cu abundante awa lauw y nos ta seca cu un serbete suave sin frega.

Pa e hidratacion di e cuero Cu un forki, nos ta machica cinco druif y cinco cherry.

E efecto hidratante di azeta di oleifi, hunto cu su vetnan esencial y vitamina E, ta ideal pa combati embehecemento prematuro.

Pa combati e lachinan riba e cara y nek, nos ta mescla 12 druif, un capsul di vitamina E y un telep di azeta di oleifi.

E ta un eficaz humectante natural carga di antioxidante pa combati embehecemento

### Tonico facial

Pa tonifica, nutri y frena embehecemento, e tonico facial aki di druif ta un idea facil pa prepara.

Nos ta blend 15 druify ta pone e juice den un recipiente. Nos ta muha un catuna cu e likido y ta pas'e na e cuero di e cara y nek.

Nos ta lag'e actua durante 10 minuut y haw'e cu abundante awa.



### Balsamo pa lipnan seco

Si bo kier preveni pa tin kraak riba e lipnan of hidrata nan pasobra bo ta sinti nan seco, e balsamo aki ta e solucion.

Nos ta kita e cuero y simia di un druif, nos ta frega e pulpa riba e lipnan y di inmediato nos ta cuminsa sinti alivio.

E accion di e pulpa riba lipnan aki, por extende riba full e cara y nek. Nos ta frega e druif riba e

Nos ta agrega un cuchara di yoghurt natural y nos ta mescla te ora cu nos haya un pasta homogeno. Nos ta aplic e pasta riba e cara y nek y nos ta lag'e actua durante 15 minuut. Nos ta hawa cu abundante awa y nos ta hidrata cu e crema di semper.

### Contra "pata de gallo"

E lachinan mahos aki cu ta surgi net na e skina di wowo, nos por combati cu e mask aki. Solamente ta rekeri dos capsul di vitamina E y dos druif berde, cual nos tin cu saca e simianan.

Nos ta machica e fruta y ta agrega e vitamina, ta aplik'e tur dia anochi na e skina di e wowonan. Nos ta haw'e mainta tempran cu abundante awa y nos ta hidrata manera di custumber.

Cu azeta di oleifi



prematuro.

Ta lag'e actua durante 30 minuut y ta haw'e cu abundante awa.

### Azeta di simia di druif

Si nos machica e simianan di 20 druif, nos ta obtene un azeta rico den vitamina C, D y E. tambe e ta posee betacaroteno, acidonan linoleico y Omega 3 y 6, pa cual e ta ideal pa regenera e cuero y aporta elasticidad.

contorno di e wowonan y boca, frenta y nek.

Despues nos ta laga e fruta reposa riba e cuero durante 20 minuut. Pa recupera e briyo di e cuero no mester inverti hopi tempo ni placa.

Esakinan ta tratamentonan natural cu druif pa rehubenece bo cuero, ta efectivo, simpel y economico. Por aplica un biaha pa siman pa miho resultado.



## FOR SALE

Commemorative coins for collection  
75 anniversary Aruba Bank Silver  
75 anniversary CMB Bank Silver  
50 anniversary  
Lago 1924-1974 copper Best offers

**Cel 5972155**

## OPORTUNIDAD PA TRABAO

Tin oportunidad pa trabao pa un  
kokki/cocinera y helper di cumind-  
anan crioyo pa un Take Away.



**Pa informacion por  
wasap 746-3571**

## E HENDE MUHE

E hende muhe cu character  
ta fuerte y balente.  
E hende muhe independiente  
mayoria ta inteligente.  
E hende muhe orguyoso  
cu por ta rebelde, pero generoso.  
E hende muhe cu curason di oro  
cu amor complaciente y profundo.  
E hende muhe amoroso  
cu ta un mama perseverante y exitoso.  
E hende muhe un ser humano special,  
un persona pa semper den nos mente y curason.  
Feliz dia Internacional di hende muhe 2022  
Lady Ari

## FOR SALE - FOR SALE - FOR SALE



Ford Shuttle Bus 2006 ~ E450 diesel  
Prijs reduci: Afl. 15.000  
Perfecto pa snack truck

**739-0101**

### MAART 18

**EXPOSICION DI ARTE** Fundacion Crea Arte Aruba | Exposicion di arte  
"Aruba Dushi Tera" y open house na Unoca, Stadionweg 21 | 11 AM - 3 PM

**MERCADO DI CUNUCU** Koolman Family Farm  
Paradera 157 B | Bendemento di fruta y berdura local | 11.30 AM - 1.30 PM

**DUSHI CUMINDA CRIYO** Seroe Blanco 82 | Bendemento di cuminda crioyo.  
Pa haci pedido por yama 5604855 of 5622350 | 12 PM - 3 PM

**NOS HIMNO Y BANDERA** Centro di bario Brazil | Cuminda crioyo, grupo di baile,  
cantamento, domino, musica y presentacion di Robert Thiel y Nicole Martinez  
12 PM - 7 PM

**DAM DI CAS ARIBA** Plaza Deto Varis | Weganan popular pa mucha y adulto  
cu premio. Bar y cushina bon surti | 1 PM - 8 PM

**CELEBRACION DIA DI HIMNO Y BANDERA** Renaissance Marketplace | Celebra  
nos cultura cu Grupo di Betico, Honeyshot, y baile folklorico | 5 PM - 10:30 PM

**Ban!**  
*cu Orguyo*  
#TACONTAGIABO



# Seleccion di Aruba lo hunga un wega amistoso na Aruba mes



Despues di 7 aña sin cu a haya e oportunidad di hunga na cas, e amantenan di futbol por mira nos seleccion nacional di futbol di Aruba den accion atrobe.

E di tres siman di maart durante di e FIFA Window, seleccion nacional lo tin un campo di entrenamento na Aruba mes y aki mas cu claro lo probecha di hunga un wega di fogueo contra di un team international di hungadornan cu ta milita den nos futbol local. E wega ta programa pa tuma lugar 25 maart proximo pa 8or di anochi den Stadion Guillermo Prospero Trinidad na Dakota.

Mester bisa cu Aruba lo bini cu 10 seleccionado biba den exterior. Mirando e interes semper pa mira nos seleccion hunga na cas, e interes lo por ta uno grandi caminda por spera un stadion sold out cu mas cu 3000 hende.

Ticket pa e wega ya ta obtenibel na oficina di AVB, Citgo Savaneta, Citgo Boulevard, Citgo Palm Beach, Urataka Center y Birds 'N Fishes. Lo tin diferente door prizes den stadion mes durante e wega. Porta lo habri ya desde 6:15 PM y pa 6:30 PM e banda Le Groove lo ta tocando den stadion.



## PRONOSTICO DI TEMPO

VALIDO TE DIARANSON 16 DI MAART 2022, 18:00 ORA.

TEMPO:

AWE ANOCHI: PARCIALMENTE NUBLA CU UN POSIBLE AWACERO PASAJERO  
DEN MARDUGA I MAYAN: VARIABLEMENTE NUBLA CU UN AWACERO PASAJERO  
TE BREVE

TEMPERATURA MAXIMO 31 GRADO CELSIUS  
TEMPERATURA MINIMO 25 GRADO CELSIUS  
INDICE DI CALOR (HEAT INDEX) DEN Y ROND  
DI ORANAN DI MERDIA: 32 PA 35 GRADO CELSIUS  
UV INDEX: 12

BAHADA DI SOLO : 6:50 PM  
SUBIDA DI SOLO : 6:46 AM

BIENTO:

MODERA TE BASTA FUERTE FOR DI OOST;  
FORSA 4 TE 5 (20 TE 39 KM/ORA, 11 TE 21 NUDO).  
DEN DIA FUERTE TE DURO DEN RAFAGA;  
FORSA 6 TE 7 (40 TE 61 KM/ORA, 22 TE 33 NUDO).

SITUACION GENERAL DI TEMPO PA PROXIMO 24 ORA:  
E AREA DI PRECION HALTO RIBA ATLANTICO LO SIGUI  
SOSTENE UN BIENTO MODERA TE BASTA FUERTE Y  
FUERTE  
TE DURO DEN RAFAGA. DE BEZ EN CUANDO BASTA NUBIA  
LO BAI PASA RIBA REGION LOCAL CU LOCALMENTE UN  
AWACERO PASAJERO TE BREVE.

CONDICIONAN MARITIMO/ ESTADO DI LAMA:  
NA PARTINAN PROTEJE DI COSTA: LEVE  
NA PARTINAN ZUID: TRANKIL TE MODERA  
NA PARTINAN OOST TE NOORDWEST DI COSTA:  
MODERA TE POCO BRUTO.

OLANAN LO TA ENTRE 5 PA 7, LOCALMENTE 8 PIA

AVISO/ ALERTA:

UN AVISO PA BOTO CHIKITO PA PARTINAN OOST TE  
NOORDWEST DI COSTA Y LAMA HABRI TA NA VIGOR  
TE PROXIMO AVISO.

FENOMENONAN SPECIAL  
NINGUN

POTENCIAL DI AWACERO PA PROXIMO 24 ORA:  
1 TE 5 MM; LOCALMENTE ESAKI POR VARIA.

REGISTRACION DI TEMPERATURA (GRADO CELSIUS) Y  
AWACERO (MM) DEN ULTIMO 24 ORA (8'AM PA 8'AM):

AIRPORT : MAX 31 / MIN 23 / 4.2 MM  
WESTPUNT: MAX 31 / MIN 24 / 3.9 MM  
STA ROSA: MAX 31 / MIN 24 / 4.4 MM

PRONOSTICO DI TEMPO PA PROXIMO 3 DIANAN:  
PARCIALMENTE NUBLA CU UN AWACERO PASAJERO.  
BIENTO LO TA FOR DI OOST Y MODERA TE BASTA  
FUERTE, FUERTE TE DURO DEN RAFAGA; TEMPERATURA  
(GRADO CELSIUS) MAX / MIN LO TA: 31 / 26





# SERVICIO Y COMPRA



## OBITUARIO

Publica serka nos anuncio di fayecimento di bo ser keri.  
Nos tin 2 pakete pa ofrese

Pakete 1: Anuncio di fayecimento te dia cu e defunto  
ser dera  
Gradicimento y invitashon pa misa pa 3 dia Afl 250,00

Pakete 2: Anuncio di fayecimento te dia cu e defunto  
ser dera  
Gradicimento y invitashon pa misa pa 3 dia

Na Canal 22 1x prome cu Noticiero 22 Afl 400,00


Pa mas informashon por tuma contacto cu oficina  
na **585-9500** of na **741-4554** puntra pa  
Jamila Henriquez

## CHAPI, VERF, CORIENTE

Ta hasi trabao di corriente verf  
welder plumbing metsla carpinte  
drecha dak hasi cura limpi  
y kap mata  
**yama: 5608568**

## SCEPTIC TANK (7 CUBE)

PRIJS SPECIAL  
**AWG 75,-**



**YAMANOS NA:**  
**560 3500 OF 563 4201**

## TA HUUR

den CENTRO COMERCIAL  
NOORD un localidad  
di 120M  
Bon situa, pa mas  
info yama: **592-3327**



## Hyundai Tucson 2009 Top 1 condition



**Call: 5942389**

## Clasificados



**SOLODIPUEBLO@GMAIL.COM**  
**CEL. 585 9500**





## Servicio na Comunidad

Brandweer	911
Polis	100
Polis Oranjestad	102
Polis San Nicolas	104
Polis Santa Cruz	105
Polis Shaba	107
Tiplijn	11141
Ambulance San Nicolas	584-5050
Ambulance Sasaki	582-5573
Ambulance Wayaca	582-1234
Horacio Oduber Hospital	527-4000
Centro Medico San Nic.	524-8833
SVB AO Ziekmelding	527-2782
Servicio nan	
Elmar storingdienst	523-7147
Web storingdienst	525-4600
Setar storingdienst	117
Digicel	145
Reina Beatrix INT Airport	524-2424
Serlimar	584-5080
Arugas	585-1198
Guarda nos costa	913
Aurora Funeral Home	588-6699
Royal Funeral Home	586-4444
Ad Patres Funeral Home	584-2299
The Olive trees Funeral Home	582-0000
Fundacion	
Rode Kruis	582-2219
Fada	583-2999
Fundacion Respetami	582-4433
Fundacion Guiami	587-1677
Muhe den dificultad	583-5400
Telefoon pa hubentud	131
Centro Kibrahacha	588-3131
Stichting Bloedbank	587-0002
Mary Joan Fundation	588-9999
Koningin Wilhelmina Fonds	582-0412
Fundacion pa nos mucha nan	583-4247

# Celebracion Himno y bandera na biblioteca



Biblioteca Nacional Aruba tambe ta celebra Dia di Himno y bandera cu e comunidad Arubano. Diabierna awor biblioteca na Playa ta habri di 9or di mainta pa 3or di atardi cu un programa festivo pa un y tur. Lo tin un Bar y cushina bon surti, benta di productonan local, un Mercado di Buki y alabes benta di mata di fruta y berdura.

Tur esaki acompaña pa diferente presentacion musical, canto y baile. Cantante Edjean Semeleer ta canta e Himno di Aruba, por spera presentacion di Robert Maduro & Company, Dazzling dancers, Tinchi farro y su caha di orgel, Grupo Sonido di Antaño. Biblioteca na Playa, diabierna awor, dia di 18 di maart 2022 di 9or pa 3or di atardi.

**18 MAART**  
NO PERDE!

**Sjabururi2#**

## CUSHINA DI RICA

### MENU DI PLATONAN CRIYO

- kroket calco
- Sopi Carni
- Sopi Oester
- Sanger Yena(Ramiro)
- Comcomber Stoba
- Carni Stoba
- Galiña Stoba
- Cabrito Stoba
- Pisca hasa
- Baki bolo
- Spam Tempera
- Baki cos dushi
- Chuculati Pinda
- Juice Lamoenchi/Tamarijn
- Mojito

**Cuminsando  
for di :12or pm**

## Clasificados

**SOLODIPUEBLO@GMAIL.COM**

**CEL.585 9500**



**GANA 500 CU FLORIN PA DIA DI SOLO Di Pueblo HIMNO Y BANDERA**

**TA ANUNCIA GANADOR DIA 17 MAART 2022**

**CORTA E COUPON Y ENTREGA NA OFICINA DI SOLO DI PUEBLO, EDIFICIO COLOR SHINISHI MEI MEI DI KFC Y TACO BOBELL NA STA CRUZ.**

**18 DI MAART Feliz dia**

## My neighbor has petroglyphs in her backyard Mi bisiña tin petroglifo den su cura

Exposicion di artista renombra internacionalmente Sjoerd Martens den MANA




Inspiracion pa e exposicion menciona ta e pinturanan riba baranca na Aruba. Sjoerd ta saca cu su celular potret y di sitionan unda nan ta situa. Pa medio di collage e ta crea scenarionan surrealista den cua e ta explora e relacion inkebrante entre e pinturanan riba baranca y e condicionnan di bida na e sitionan. Tambe lo presenta un video den cua ta presenta transformacion di paisahenan natural, naturalesa cultiva y di propiedad priva.

Den siglonan pasa e sitionan arkeologico cu pintura tabata sagrado pero awendia ta carga peso di accionnan humano cu ta mancha nan ser. Ta insigur con largo e paisahenan precioso existente por sigui den nan forma actual ... Cu e obranan presenta Sjoerd ta conscientisa nos di e bunitesa di paisahenan (arkeologico) di Aruba y con nos por siña na proteha esakinan mihor.

MANA (Museo Arqueo-

logico Nacional Aruba) ta orguyoso di por presenta arte (audio) visual di Sjoerd Martens. Sjoerd a expone, entre otro na Marina Abromović Institute - New York/ Merca, Les Recontres de la photographie - Arles/ Francia y na Biennale di Venezia - Italia. Sjoerd ta trahando riba un publicacion artistico den cua tin e ta presenta mas creacion basa riba estudio di e pinturanan di 2019 pa 2021. Prins Bernard Cultuur Fonds Caribisch Gebied a financia parti di



e publicacion aki. Ta di spera cu otro fondonan lo sa tambe di sostene e publicacion fasinante aki pa e por keda cla mitar di 2022.

MANA lo ta habri durante siman den su oranan regular di 9 or di mainta pa 5 or di atardi. Riba Dia di Himno y Bandera di 10 or di mainta pa 2 or di merdia pa asina duna

oportunidad na un y tur pa pasa y admira e obranan di e artista Sjoerd Martens. Tambe MANA ta recorda cu e exposicion Fissures di Belinda de Veer ta drelando su ultimo simannan. Ademá por bishita Exposicion di Caribbean Ties y e exposicion di Historia di Parokia di Noord den Convento di Imeldahof.

**HOTLINE**

**SOLO Di Pueblo**

**744-0444**

**CAPT'E Y MAND'E**





Lotto MERDIA  
MAART 14

<b>CATACHI</b>	<b>LOTTO 5</b>	
Sorteo # 3502	Sorteo #	Joker Letter
<b>1179</b>	0 x Jackpot	Proximo Jackpot
<b>7801</b>	0 x Match 4+	<b>300.000,-</b>
<b>6411</b>	0 x Match 4	
<b>MULTI-X</b>	0 x Afl. 12,00	
<b>X3</b>		
<b>BIG 4</b>		
Sorteo # 3502		
<b>3765</b>		
<b>1OFF</b>		
Sorteo # 1558		
<b>4942</b>		
<b>ZODIAC</b>		
Sorteo # 3502		
<b>8366</b>		
<b>Scorpio</b>		
<b>LUCKY 3</b>		
Sorteo # 376		
<b>034</b>		
<b>MULTI-X</b>		
<b>X2</b>		

Lotto ANOCHI  
MAART 14

<b>CATACHI</b>	<b>LOTTO 5</b>	
Sorteo # 7589	Sorteo #	Joker Letter
<b>5678</b>	0 x Jackpot	Proximo Jackpot
<b>0861</b>	0 x Match 4+	<b>300.000,-</b>
<b>7835</b>	0 x Match 4	
<b>MULTI-X</b>	0 x Afl. 12,00	
<b>X3</b>		
<b>BIG 4</b>		
Sorteo # 6633		
<b>4816</b>		
<b>1OFF</b>		
Sorteo # 1338		
<b>9544</b>		
<b>ZODIAC</b>		
Sorteo # 5392		
<b>2538</b>		
<b>Scorpio</b>		
<b>LUCKY 3</b>		
Sorteo # 322		
<b>879</b>		
<b>MULTI-X</b>		
<b>X2</b>		



Torneo Himno y Bandera di Bolas Criollas na Papaya Ranch

Diabierna 18 maart 2022 pa 10:00 mainta lo tuma inicio na Torneo Himno y Bandera di Bolas Criollas na Papaya Ranch. Lo tin participaci3n total di 16 ekipo den categori3a di caballeros y 12 ekipo den categori3a di damas. Lo tin canto di Himno y hisamento di Bandera prome cu e ekiponan cuminsa batalla pa asina anochi tin e gran final pa haya resultado di Campeon, Sub-Campeon, 3er y 4to lugar den cada categori3a. Tambe lo tin Mihor Boche y Mihor Arrime den cada categori3a.

Papaya Ranch ta invita henter pueblo di Aruba pa bin apoya nos ekiponan di bolas criollas y pasa dia cu famia y disfruta di un bar bon surti y cushina crioyo crioyo!

Ban hunto celebra nos Dia Nacional y engrandece bolas criollas y deporte di Aruba en general.

Lotto MERDIA  
MAART 15

<b>CATACHI</b>	<b>LOTTO 5</b>	
Sorteo # 3503	Sorteo #	Joker Letter
<b>6558</b>	0 x Jackpot	Proximo Jackpot
<b>0203</b>	0 x Match 4+	<b>300.000,-</b>
<b>5068</b>	0 x Match 4	
<b>MULTI-X</b>	0 x Afl. 12,00	
<b>X2</b>		
<b>BIG 4</b>		
Sorteo # 3503		
<b>0812</b>		
<b>1OFF</b>		
Sorteo # 1559		
<b>3747</b>		
<b>ZODIAC</b>		
Sorteo # 3503		
<b>4236</b>		
<b>Piscis</b>		
<b>LUCKY 3</b>		
Sorteo # 377		
<b>387</b>		
<b>MULTI-X</b>		
<b>X2</b>		



# 18 di maart dia di Himno y Bandera di Aruba

E dia nacional mas importante di Aruba ta dia di Himno y Bandera

18 maart ta e dia cu a scoge pa celebra himno y bandera di Aruba, pasobra durante Mesa Rondo na Hulanda riba e fecha ey na aña 1948 pa promebiaha a entrega un mocion na Su Mahestad Reina Juliana, cu ta boga pa autodeterminacion di e pueblo Arubano. E delegacion Arubano tabata bou di liderazgo di Shon A. Eman y 2147 Arubiano a firma e peticion aki.

Gilberto François "Betico" Croes como politico a dedica su mes mas tanto pa e derecho di autodeterminacion di e pueblo Arubano. Despues cu Hulanda a nenga pa negocia na januari 1976 tocante un luga apart di Aruba denter di Reino Hulandes, Betico Croes a indica cu lo declara independencia unilateralmente na maart 1981. Pa fortalece e consciencia nacionalista, riba su proposicion e bandera di Aruba y himno di Aruba propio a keda instala como simbolonan di identidad durante un manifestacion den Stadion di Wilhelmina na Dakota riba 18 maart 1976.

Mientras cu ta hisa e bandera Arubano pa promebiaha den Stadion Wilhelmina, e coro di Maybeline Arends Croes riba acompañamento di orkestra filharmonico di Aruba bou di guia di e musico conoci Joy Kock, a canta e composicion, un wals di Padu Lampe y difunto Rufo Wever "Aruba Dushi Tera" como e himno Arubano. Pueblo Arubano tabata masalmente presente pa duna e Bandera y Himno su honor.

Bandera di Aruba

E bandera di Aruba a keda introduci oficialmente riba 18 di maart 1976, hunto cu e himno oficial "Aruba Dushi Tera". Desde cu Aruba a haya su Status Aparte riba 1 di januari 1986, loke ta encera cu Aruba a bira

un pais autonomo den Reino Hulandes, e bandera a bira e bandera di Pais Aruba. E bandera di Aruba tin 4 color, geel, blauw, blanco y cora.

- Blauw: ta nifica e lama inmenso cu ta rondona Aruba. E color di fondo di e bandera ta blauw cu e code PMS 279 C of larkspur.

- Geel: ta colo di abundancia y e liñanan horizontal ta representa e solidaridad di esaki. Geel tambe ta simbolisa e industria actual y turismo como fuente di entrada mas importante, mescos cu oro y industria di aloe for di e pasado industrial. E colo geel di e liñanan ta Bunting Yellow. E colo ta para tambe pa e palonan y e matanan di Aruba cu ta floria geel, manera Kibrahacha, Brazil, Bonchi di Strena, curahou, tuturutu y wanglo.

- Blanco: ta simbolisa e playanan blanco manera sneeuw y e puresa di e pueblo Arubano.

- E strea: (blanco/cora) ta representa e cuater puntonan di un compas y ta simbolisa e origen di e poblacion for di tur skina di mundo. Ademas e ta representa e industria bieu di palo di Brazil y tambe como un homenage na e sanger indjan, cu den Rooi Frances (Franse Pas) a basha pa e libertad di Aruba. E cora di e strea ta Union Jack Red.

Himno nacional  
E himno di Aruba ta "Aruba Dushi Tera" skirbi den aña 50 door di Juan Chabaya (Padu) Lampe cu un composicion di Rufo Wever. E coro di De Trupialen a graba e cantica na 1954 y "Aruba Dushi Tera" a sigui resona durante tur evento oficial. Hubert (Lio) Booi a skirbi un couplet adicional na 1976. E cantica a bira asina popular bou di pueblo cu riba 18 di maart 1976 a introduci Aruba Dushi

Tera como himno nacional di Aruba.

Aruba dushi tera  
Aruba patria aprecia  
nos cuna venera  
chikito y simpel bo por ta  
pero si respeta.

Refrein:

O, Aruba, dushi tera  
nos baranca tan stima  
nos amor p'abo t'asina  
grandi

cu n'tin nada pa kibre  
cu n'tin nada pa kibre  
Bo playanan tan admira  
cu palma tur dorna  
bo escudo y bandera ta  
orguyo di nos tur!

Refrein

Grandeza di bo pueblo ta  
su gran cordialidad  
cu Dios por guía y conserva  
su amor pa libertad!



## CELEBRACION *Dia di Himno y Bandera*

### MAART 17

**BIKER'S FEST** Carnival Village | Musica en bibo, cuminda y bebida | 6 PM - 1 AM

**MANIFESTACION CULTURAL** Plaza Betico Croes  
Cuminda local y presentacionnan artistico | 7 PM - 10:30 PM

**ARUBA TA NOS** Patio 15 | Musica y cena a-la-carte combina cu un fiesta bailable  
E cena ta gratis di 7:30 PM pa 9:30 PM, despues e fiesta di 10 PM pa 2 AM  
tin entrada di Awg. 15,- | Pa reserva mesa yama 5925069

**HIMNO & VINO** The Wine Room | Prosecco bar y musica en bibo di Chriss Kross.  
Afl. 68,25 pa persona | 7 PM - 10 PM

### MAART 18

**HIMNO Y BANDERA OPEN WATER RACE** Aruba Open Water Swimming  
Boca Catalina | Careda di landamento pa mucha homber y mucha muhe | 7 AM - 12 PM

**CAREDA DI BOTO MINIATURA** Stichting Rancho  
Governor's Bay Beach | 8 AM - 3 PM

**FESTIVAL NACIONAL** Archivo Nacional Aruba | Exposicion Aruba, den machine di tempo. Bar y cushina bon surti. Musica en bibo di Robert Maduro, Azucar Band, Koolbros Entertainment, Youth Extreme | 8 AM - 6 PM

**EVENTO CULTURAL** Fundacion Centro Famia Piedra Plat  
Benta di cuminda, vlooiemarkt, koffie-morgen | 8:30 AM - 4:30 PM

**CELEBRACION DIA DI HIMNO Y BANDERA** Aruba Aloe Factory | Gratis tours di e fabrica y descuento di Dollar pa Florin riba tur producto | 8:30 AM - 4:30 PM

**ACTO PROTOCOLAR Y DESFILE** Plaza Betico Croes | 9 AM - 12:30 PM



## Preguntanan por escrito di miembro di Parlamento, sra. drs. Marisol J. Lopez-Tromp, na Minister di Labor, Energía y Integración sr. Glembert F. Croes conforme articulo III.17 di Staatsregeling y conforme artikel 59 di Reglement van Orde van de Staten van Aruba.

A base di e Decreto Ministerial ( Ministeriële Beschikking) cu Minister di Labor, Energia y Integracion sr Glembert Croes a manda pa e departamento di DIMAS ( Departamento di Integracion y Admision y Stranheronan) aña pasa dia 01 di november 2021, mi kier haci e siguiente preguntanan, cu mi persona a hasi durante e reunion publico di Parlamento di dia 25 di november 2021 caba, pero pa motibo cu e reunion publico ey no a continua, mi persona no a haña contesta ni durante ni despues riba mi preguntanan.

1. Minister por a manda Parlamento copia di e Ministeriële Beschikking d.d. 15 oktober 2021, kenmerk nr. BMAEI-229/21?

2. Minister por manda Parlamento un copia di e "startnotitie Toelatings- en Integratiebeleid voor de kabinetperiode Wever-Croes II" ?

3. Minister Croes por entrega Parlamento tur documento di maneho (nobo) -desde cu Gabinete Wever- Croes II a sinta dia 20 di september 2021-, cu Bo persona y/of bo departamentonan a traha den cuadro di e maneho di Admision y Integracion?

4. Minister Croes por informa Parlamento si Minister ta cumpliendo cu e obligacionnan di e Tratadonan cu nos pais Aruba ta mara na dje, cu ta regarda maneho di Minister su cartera y ehecusion di esaki nan?

5. Recientemente Gobierno a anuncia cu lo a instala un comishon ' nobo' segun e LTU ta prescribi.  
- Ken tur ta forma parti di e comishon aki y kiko tur ta tarea y experticio di cada un den e trabou aki?  
- Segun cual criteria nan y procedura nan a wordu apunta?  
- A cumpli cu e principionan di Good Corporate Governance?

6. E Decreto Ministerial aki tin consecuencia pa e forma di proceder den cierto departamento(nan) y nos kier claridad riba esaki. Cu e apoderacion (machtiging) aki segun articulo 2, 3, 4, y 5 di e MB, Minister Glembert Croes ta duna sr Mario Croes un autoridad igual na e Director di DIMAS sra Paskel.

- Nan dos ta firma documentonan hunto?

- Of nan dos ta firma diferente documento den forma separa?

- Tur dos persona ta mes responsabel pa e desishonnan?

- Si acaso nan ta firma y tuma desishonnan apart di otro, tur dos ta haña y mira y lesa tur documento/ peticion cu ta rekeri aprobacion di nan?

7. Articulo 3 di e MB, ta papia di "inclusief eventuele aanvullende instructies". Ministro por informa Parlamento na kende (nan) ta referi den e articulo aki cu por duna e "aanvullende instructies" nan aki?

8. Minister Croes por splica kiko Parlamento mester compronde bou di un "gelijkwaardig mandaat" manera formula den artikel 4 di e Decreto Ministerial ?

- Minister por duna Parlamento un splicacion amplio y detalla con den practica e trabou ta reparti entre e directora sra Paskel y e leidinggevende sr Wever?

- Minister por splica Parlamento con e proceduranan ta cana y con ta dicidi riba e peticionnan? Si por splica e procedura stap pa stap.

- Tur miembro di e comishon mester ta di acuerdo?

9. Minister por splica Parlamento con ta dicidi ken ta firma kiko entre e directora y e leidinggevende?

10. Cualnan ta e "nader te maken afspraken" pa cu e administratieve organisatie cu ta referi na dje den e MB?

11. Por duna Parlamento copia di e periodieke rapportages cu segun e MB

aki a wordu traha?

12. Segun articulo 3 di e Decreto Ministerial ( articulo 3), kende (nan) actualmente ta esnan cu por y ta dunando instructiecionnan?

13. E consehero y coordinadornan na Buro di Minister Croes ta duna instructies? - Minister mes tambe ta duna instructies?

14. Kiko ta e conseho di Departamento di Recurso Humano (DRH) riba e MB aki? - DRH ta di acuerdo cu e contenido? - DRH a duna conseho riba e mandato?

15. Kiko ta e conseho di DRH riba e nombramento di e leidinggevende sr Wever? - For di kende (nan) e ta ricibi conseho



huridico? - For di esnan den DIMAS? - For di esnan na Buro di Minister?

Spera di por ricibi pronto e contesta nan por escrito riba su preguntanan pa trece claridad, ta keda,

**MAART 18**

**TORNEO NACIONAL DI BOLAS CRIOLLAS** Papaya Ranch  
Weganan den diferente categoria y bendemento di cuminda | 9 AM - 8 PM

**BIN CELEBRA HIMNO Y BANDERA** Biblioteca Nacional Oranjestad | Mercado di buki segunda mano, benta di producto local, y entretenimento | 9 AM - 3 PM

**CELEBRACION DIA DI HIMNO Y BANDERA** Centro di bario Savaneta  
Savaneta 340 b | Koffiemorgen te 11.30 AM, despues wega popular, entretenimento, gruponan di baile, y mini bazaar | 9.30 - 6 PM

**MURAL TOURS** Artisa | Tour di e murals na San Nicolas. Prijs ta inclui botter di awa.  
Avg. 18, 9.30 AM and 4.30 PM. Pa reservacion by yama 5934475

**ACTIVIDAD PA RECAUDA FONDO** Stichting Hunga Teca | Parke Neptali Henriquez, Surfside | Bendemento di cuminda y vlooiemarkt cu mata, buki, grabbelton, paña y hopi mas. | 10 AM - 2 PM

**ART & CROUTONS SOUP FESTIVAL** Cas Di Cultura  
Bendemento di diferente sopi y mercado di arte | 10 AM - 3 PM

**EXPO ARQUEOLOGICO** Museo Arqueologico | Exposicion arqueologico nobo, Exposicionnan di Belinda de Veer y Sjoerd Martens | 10 AM - 2 PM

**EXPO LAZONAN CARIBEÑO** Kapel Imeldahof | Conoce mas di historia di Caribe y Aruba miles di a a prome cu Cristo te awendia | 10 AM - 2 PM

**PALAPAS VLOOIENMARKT** Palapas | Socotorolaan 16. Bendemento di cuminda y bebida, arte, matanan y hopi mas | 10 AM - 3 PM



## Gradicimento y Invitacion

Di profundo di nos curazon nos ta gradici tur persona cu di un of otro manera a muestra atenshon, amor y cariño durante entiero di:



### Johanna Virgilia Albertsz-Angela

Un danki na tur cu a manda flor, krans, whatsapp y haci yamadanan telefónico. Nos kier a gradici Dr. Singh. Un danki tambe na Aurora Funeral Home y sr. Randall Croes. Boso muestra di atenshon ta hopi di aprecia y un gran sosten pa famia.

Alavez nos ta invita tur famia, bisiñanan, conocirnan pa compaña nos na 2 Santo Sacrificio di misa cu lo tuma lugar na Misa inmaculada concepcion na Sta Cruz: Diamars 15 di maart 2022 pa 7:00 p.m. Diahuebs 17 di maart 2022 pa 7:00 p.m.

Después di e ultimo misa lo tin rosario na cas Jan Flemming 6 E

Boso presencia lo ta altamente aprecia.


Ora boso ta tristo y ta hayando mi falta, busca otro y corda riba e Amor cu mi a comparti cu boso.  
Haya mi falta, pero lagami bai.

Cu inmenso dolor na nos curason, pero conforme cu boluntad di Dios nos ta anuncia fayecimento di nos ser keri:

## Demetrio Saturnino de Cuba

Cariñosamente yama "Shonme"

\*29-11-1944 - †11-3-2022



Na number di su:

Esposa: Shirley R de Cuba-Canhigh  
Yiu: Michel de Cuba y esposa Charlotte de Cuba-Maduro  
Nieto: Chamyl de Cuba y Ava Rooijackers  
Nieta: Micha de Cuba

Rumanan: Vdo. Alberto "Boei" de Cuba y Famia  
Filomena "Mena" y Buchi Geerman-de Cuba y Famia na Hulanda  
Juan y Rubia de Cuba y Famia  
†Tida Henriquez y Famia  
†Eve Croes y Famia  
†Maria Franken y Famia  
†Dionisia Maduro y Famia  
†Jossy de Cuba y famia  
†Ignacio de Cuba Y Famia  
†Lucia de Cuba y Famia

Cuñanan: Vda. Betty Wolf-Canhigh y Famia  
Vda. Mable Bollebakker-Canhigh y Famia  
Elaine Giel-Canhigh y Ruben Giel y Famia  
†Alfreda Canhigh y Famia  
†Keith Canhigh y Famia  
†Cecily Canhigh

Con suegro: Alfred "Freddy" Maduro y Famia

Tur su Sobrino y Sobrinanan, Primo y Primanan, su Ihanan, Bisiñanan.

Tur su ex coleganan di Brandweer Aruba.

Su Ayudante: Yris Perez-Ventura  
Ana Duarte  
Lola Tong

Su bon amigonan di cas: Pablo y Marianna Wanga y Famia, Lamberto "Buchi" y Erna Geerman, John Tong

Demas Famianan: de Cuba, Canhigh, Maduro, Giel, Bollebakker, Wolf, Croes, Koolman, Henriquez, Franken, Geerman, Vrolijk, Jarzagaray, Krozendijk, Rasmijn, Rollock, Tjon Sie Fat, Boekhoudt, Thijsen, Gil, de Lange, Vlaun, Wever, Schwengle, Oduber, Wanga, Perez, Kransen, Dania, Kelly, Maderbocus, Hayward, Rooijackers, Evertsz, van der Zwaan, Dreischor, Lacle, Gent, Gomes, Tromp, Moore.

Nos ta pidi nos disculpa si den nos tristeza nos por a lubida un of mas famia.

Entiero lo tuma lugar diarason 16 di Maart di 9 am - 11 am na misa Sagrado Curason na Savaneta despues lo hiba nos defunto stima na su ultimo lugar di sosiego na Santana Central Sabana Basora.

Oportunidad pa condolencia: Diamars 15 Maart di 7 pm - 9 pm na Aurora Funeral Home.

Ta duel nos cu nos no por ricibi bishita di condolencia na cas

## Paga bo cuenta online ta facil

Sea  
Abonnement  
of Aviso



Pago online,  
facil y lihe

Pa hasi pago online pone number y adres na  
cuenta di banco RBC Sunmax Printing  
account # 7700000100152447



# FORTALEZA PA FAMIA

Scirbi pa Pastor Marcel Balootje

## COMUNICA CU DIOS



Señor nos ta bini dilanti di bo trono di gracia awe , y nos ta reconoce cu bo ta Dios Todopoderoso, Rey di Reynan y Señor di Señornan ..

Pesey den nomber di Cristo Hesus nos ta bini contra tur poder di malesa, tur poder di scuridad, tur poder satanico, tur nubia scur cu ta rondona e isla aki y nos ta yama riba e Sanger di Cristo Hesus cu a wordo derama riba sero di Golgota y tin poder pa tumba tur muraya di malicia , tur locual cu ta contra e palabra di Dios, tur desobediencia ta wordo bashi abao, den nomber di Cristo Hesus,

Nos ta bini contra e spirito di coronavirus cu kier domina e isla aki, y nos ta reprende den nomber di Cristo Hesus , tur spirito di malesa tin cu bay pa tera seco den nomber di Cristo Hesus.

Nos ta cubri Aruba y tur isla di Caribe Hulandes bao di e sanger di Cristo Hesus y nos ta declara cu Aruba ta pertenece na Cristo y cu ningun forsa di scuridad y ningun malesa of virus por domina riba e isla aki.

Senjor habri wowo di tur hemde , pa nan realisa y acepta cu Hesus Cristo ta Señor y den Su Nomber nos ta mas cu vencedor.

Señor nos ta yama bo danki pa scucha y contesta oracion, pasobra solamente den Bo nomber tin poder, pone Bo man riba cada cas di famia, riba tur dokter y tur frontliners , polis etc y cuida nan den nomber di Cristo Hesus amen.

Asina nos ta comunica cu Dios den nomber di Cristo Hesus, pasobra tur locual

nos pidi Dios den nomber di Cristo Hesus e ta duna nos.( Juan 15:7)

Jeremias 29 ver 12 + 13 ta bisa: Anto boso lo sclama na MI y haci oracion na MI y lo MI scucha boso.

Y boso lo busca MI y haña MI si boso buscam di henter boso curazon, 1 Tesalonisenses 5 vers 16— 18 ta para scirbi : Regocija semper, Haci oracion sin stop , Sea agradecido den tur cos , pasobra esaki ta e voluntad di Dios pa boso den Cristo Hesus .

Nos tin nada mas grandi ora nos tur realisa, cu nos tin mester di oracion, cu nos tin mester di Dios y cu nos tin cu depende di Dios, pasobra ora nos ta obediente , ta un muestra cu nos ta somete na Dios, 1 Timoteo capitulo 2 vers 1 – 5 ta para scirbi: Pesey prome cu tur cos mi ta exhorta , pa suplica, oracion , peticion y gradicimento wordo haci pa tur hende, pa Reynan y tur esnan den autoridad , pa nos hiba un bida trankil y den tur santidad y dignidad.

Esaki ta bon y aceptabel den bista di Dios nos Salbador.Kende ta desea pa tur wordo salba y yega na conocimiento di e berdad. Pasobra ta un Dios so tin, y un Mediador entre Dios y hende , e hende Cristo Hesus.

Un biaha mas nos ta pidi pueblo nan tur pa uni den oracion, pa confia den Señor pasobra den Señor nos Dios tin poder pa salba, pa sana,libera y paz. ( Isaías 26 v 3+ 4).

Sinceramente  
Pastor Marcel Balootje.

### Albertis -Jearick Murray or BertisBoss

Ata-un gran bendishon pa sister Freddy cu su perdidia pero Dios ta on cu su famia nan I mr VIP tin e honor on 24/7 paso E persona tawata un de real cu Amor y Amigo God bless tur dia broer. You have given aloof yourself You have lived & loved.You have chosen to spread your wings so fly as high as you can. you were always stay VIP KING. But now you are VIP ANGEL & King Di parti bo amigo real semper VIP Aprecia Mr Murray cu su glamor na ordi Bendishon di mr Raul bryson or MR VIP MS VIP or MS Delsy Bryson

### Words of Thanks & Invitation



**Albertis Jearick Murray**  
Better known as: Bertis, Albert or Boss  
Sunrise 16 March 1957 -  
Sunset 8 December 2021



## Oracion di dia

Un feliz dia bendiciona y cu Dios brasa boso cu Su amor.

..."Sigui Mi y Mi ta haci boso piscado di hende" Mt 4, 19

Mescos cu Simon, Pedro y su ruman Andreas, awe Hesus ta yama nos pa sigui'E. Ta Hesus mes ta yama nos y no ta nos ta scohe e caminda pa sigui Hesus.

Dios ta planta e simia di amor den nos curason pa nos sigui'E y pa nos por stima Hesus tur dia un tiki mas. Ta e amor aki ta yuda nos comparti den caridad cu nos prohimo y tur esnan menosprecia. Ora cu nos acepta e invitacion pa sigui Hesus, nos lo compronde cu Dios no tin un orario. Nos entrega tambe mester ta uno total sin orario pa Dios y tampoco sin orario pa nos prohimo.

Oracion: Señor, nos ta yama Bo danki pa Bo yamada pa nos sigui Bo. Anima nos hobennan pa nan tambe por acepta Bo invitacion pa sigui Bo y crea un comunidad di rumannan den Cristo, un famia grandi di yiunan di Dios compartiendo amor cu otro. Tur esaki nos ta pidi Bo pa intercesion di San Andres Apostel. Amen.





## Rosario Bibó diahuebs 17 di maart na Alto Vista

Diahuebs awo, 17 di maart, lo tin otro Rosario Bibó na kapel di Alto Vista pa 7 or y mey di anochi. Lo ta bispo di celebracion di e dia Nacional di Aruba y lo resa pa felicidad y prosperidad di nos dushi Aruba. Felicidad den cada hogar y prosperidad no solamente material, pero tambe spiritualmente. Ta invita hoben y adulto pa uni den orashon pa resa pa salud di tur enfermo na cas, na hospital, pa nos grandinan y pa tur cu sufri di un of otro enfermedad. Pa nan haya sanacion y pone tur fe y confianza den Señor kende tin remedi pa tur malesa. Pues diahuebs awo, tur hende ta invita pa asisti na otro Rosario Bibó pa 7 or y mey di anochi na Alto Vista.

## Lansamento di e banda Los Rokkeros



E siman cu a pasa, e hobennan di e banda cu ta yama nan mes LOS ROKKEROS a lansa nan mes den Hard Grooves Jazz Café na Oranjestad. Famia- y amigonan tawata presente pa disfruta y desea e integrantenan tur exito di mundo. E banda ta consiti di alumnonan di Filomena College Mavo na San Nicolas. Algun cancion presenta tawata e cover “My kind of women” di Mac DeMarco y nan cancion nobo titula “New beginnings”. E banda ta

consiti di e gitarista Jason Diaz, basista Michael-John Johnson, e drummer Kendall Hoo y e cantante principal Davian Oyib. Los Rokkeros ta gradici Michaelangelo Koolman y tur nan amigonan cu a bin apoya nan. Por bishita nan INSTA therokkeros page pa mas informacion.

**PUEBLO A HAÑA SU  
PEN BEK**  
Pa kualkier informacion  
solodipueblo@gmail.com  
of  
☎ 585-9500

## Invitacion di Parokia “Inmaculada Concepcion” Santa Cruz pa 18 di maart Dia di Aruba

Den conexion cu celebracion di Dia di Himno y Bandera, Pastor Jairo Maduro y Pader Jose Nava ta participa lo siguiente:

Diabierna, dia 18 di maart – 8:00 di mainta Caminda di Cruz lo tuma luga den Misa “Inmaculada Concepcion” y pa 9:00 di mainta lo celebra Santo Sacrificio di Misa di gradicimento.

Tene cuenta cu lo no tin Sacrificio di Misa anochi. Pastor Jairo y Pader Jose ta invita tur parokiano di Santa Cruz y otro parokia pa tuma parti na e Caminda di Cruz y Sacrificio di Misa.

Bin gradici Tata pa tur bendicion ricibi y pa E sigi drama Su bendicion riba e pueblo di Aruba. Pasa un feliz dia, y celebra Dia di Aruba sanamente.

### Gradicimento y invitacion

Pa medio di esaki nos kier a gradici tur esnan cu di un manera of otro a sostene nos na momento di fayecimento y entierro di nos defunto stima:



## Reinita Andrea Tromp – Jacobs

Boso gesto y palabra ta un gran Consuelo pa nos.

Un danki special ta bai pa Dr. Kareem Aljaf, Lienchi, Vicky, Gisbert, George, Theo, Igmarr y pa e staf y personal di Aurora Funeral Home pa nan excelente servicio y alaves ta invita pa 3 Sacrificio di misa

Dialuna	14 maart 2022 Sta Anna na Noord pa 6.30 p.m.
Diaranson	16 maart 2022 Sta Anna na Noord pa 6.30 p.m.
Diabierna	18 maart 2022 Sta Anna na Noord pa 6.30 p.m.





3			8		1			2
2		1		3		6		4
			2		4			
8		9				1		6
	6						5	
7		2				4		9
			5		9			
9		4		8		7		5
6			1		7			3

7				2		4	8	
2		6			8			5
5			9					
			1	5				
	2						6	
				6	7			
					6			3
6			5			1		4
	9	3		4				7

## Sopi di Letranan

H E M I S F E R I O R I C  
A I I P R D M N N Z R J E  
F N P T A I M E O E Y K R  
E R I O U I M U C T G L E  
S X F L T T U R Q R N Ñ B  
R O P L E A J O E O M A E  
H M B V J I L N X C R T L  
A L A D G I M A C N A I O  
S I S P A N I S M V I R J  
B H K I K O L U B O L D Ñ  
H I P O F I S I S G G N P  
F K L Ñ O L A F E C N E O  
T O O P M A C O P I H D K

Amígdala  
Axón  
Cerebelo  
Dendrita  
Encéfalo  
Glía  
Hemisferio  
Hipocampo  
Hipófisis  
Hipotálamo  
Lóbulo  
Mielina  
Neurona  
Sinapsis  
Tálamo

